



特別  
ル 5  
3537  
26





1875  
32



門九五  
號3537  
卷26

重修揚州府志卷之四十四

宦蹟志二

元

張炤字彥明濟南人至元十三年陞太中大夫揚州路  
總管府達魯花赤商議行中書省事行省在揚州據南  
北要津炤撫綏勞來上下安之

元史二百七十

詹士龍字雲卿光州固始人令興化招流亡崇學宮修  
築捍海堰三百餘里數郡利之初發地得范仲淹石記  
云遇詹再修人以爲前定云轉兩淮運司判官歷遷江  
南行臺御史退隱興化葺草堂於得勝湖召爲廣西僉





事居二年移疾歸

嘉靖志 興化志云士龍父仕宋為

執不食死士龍生三歲與母俱北遷董文炳憫其忠臣裔養為已子長而復姓文炳弟文忠薦為興化尹

董文用字彥材至元二十二年拜江淮行中書省參知政事行省長官者素貴多傲同列莫敢仰視跪起稟白如上官文用至則坐堂上侃侃與論是非可否無所遷就數忤之不顧也有以帝命建塔於宋故宮者有司奉行甚急天大雨雪入山伐木死者數百人猶欲并建大寺文用謂非時役民民不堪命矣少徐之如何長官曰叅政欲格上命邪文用曰非敢格上命困民力而失民心豈上意耶其人意沮遂寬其期

元史一百四十八案文用真定藁城人

具董俊傳

燕公楠字國材南康建昌人至元二十二年除僉江浙行中書省事俄移江淮尚書省立就僉江淮行尚書省事江淮在宋為邊陲故多閑田公楠請置兩淮屯田勸導有方田日以墾除大司農領八道勸農營田司事按行郡縣興利舉弊績用大著拜江淮行中書省參知政事

元史一百七十三

胡長孺字汲仲婺州永康人至元二十五年拜集賢修撰與宰相議不合調教授揚州長孺光明雄偉以孟子自許惟恐斯道之失其傳誘引不倦一時學者慕之方



重刊揚州府志 卷之四十四  
嶽大臣與郡二千石聘致庠序敷繹經義環聽者數百人

元史一百九十

朱霽字京周爲淮東路都督知揚州元貞改元轉台州路所至廉平政理名聲流聞吏民愛慕豪強悅服浙江通志郝彬字景文霸州信安人擢揚州路治中宋末鄞縣賊顧閏聚衆海島時出攻剽宋羈縻以官內附後益橫侵揚州境彬討擒之國家經費鹽利居十之八而兩淮鹽當天下之半法日以壞以彬行戶部尙書經理之彬請度舟車所通道理所均建六倉煮鹽於場運積之倉歲首聽羣商於轉運司探倉籌定其所乃買券又定河商

江商市易之不如法者著爲法

元史一百七十

敬儼字威卿其先河東人徙易水至大元年授左司郎中擢江南諸道行御史臺治書侍御史先是儼以議立尙書省忤宰臣意適兩淮鹽法久滯乃左遷儼爲轉運使欲以陷之比至首劾場官之貪汚者法旣大行課復增羨至二十五萬引河南行省叅政來會鹽筴將以羨數爲歲入常額儼以亭戶凋敝已甚以羨爲額民力將殫病人爲已非宰臣事事遂止

元史一百七十五案儼於皇慶二年會移疾

退居眞州見本傳

王都中字元俞福寧州人武宗詔更鈔法行銅錢以都



中爲江淮泉貨監天下爲監者六惟江淮鑄錢最精除兩浙都轉運鹽使役平課足公私便之元統初朝廷以兩淮鹽法久壞命都中以正奉大夫行戶部尙書兩淮都轉運鹽使都中旣至參酌前所行於兩浙者次第施行之鹽法遂修歷仕四十餘年所至政譽輒暴著而治郡之績雖古循吏無以尙之

元史一百八十四

高睿資稟直亮除淮東道肅政廉訪使盜竊真州庫鈔三萬緡有司大索追逮平民數百人吏因爲奸利睿躬自詳讞得其情卽縱遣之未幾果得真盜拜南臺御史

中丞

元史一百二十五 案睿河西人具高智耀傳

張震字威亨清苑人泰定元年知真州州介江淮百貨叢委俗尙駟僧行旅苦之震爲誅其尤者又新廟學鑄祭器繕陂塘鞠冤獄多異政士民感畏焉震性至孝奔母喪悲動行路卽告老加中順大夫致仕

儀徵縣志

王克敬字叔能大寧人遷淮東廉訪使以正綱紀爲已任不縱貪墨不附宗戚聲譽甚著

元史一百八十四

吳師道字正傳婺州蘭溪人授高郵縣丞明達文法吏不敢欺

元史一百九十

蘇天爵字伯修真定人後至元五年出爲淮東道肅政廉訪使憲綱大振一道肅然

元史一百八十三



張楨字約中汴人除高郵縣尹門無私謁縣民張提領武斷鄉曲一日至縣有所囑楨執之盡得其罪狀里中受其抑者咸來訴乃杖而徙之人以為快守城千戶狗兒妻崔氏為小婦所譖虐死其鬼憑七歲女詣縣訴言尸見瘞舍後楨率吏卒即其所發土得尸拘狗兒及小婦鞫之皆伏辜人以為神明

元史一百八十六

舊志有納速刺丁趙璉李齊盛昭董搏霄石普六人今並詳事畧志又史弼無宦蹟舊載三至碑今移入

### 金石志

明

張德林鳳陽人明初以功授江淮分院元帥丁酉七月繆大亨率師取揚州以其地要害置江淮翼元帥府命德林同耿再成守焉時籍城中居民僅存十八家德林招集流亡威肅惠懷軍民輯睦以舊城虛曠截西南隅築而守之今揚州府城即德林所築也

萬麻江都志

繆大亨定遠人初糾義兵屯橫澗山太祖諭降之從征有功擢元帥總兵取揚州克之降青軍元帥張明鑑初明鑑聚眾淮西以青布為號稱青軍又稱長槍軍由含山轉掠揚州大亨攻降得眾數萬改江淮翼元帥府為江南分樞密院以大亨為同僉樞密院事總制揚州鎮



江大亨有治畧寬厚不擾而治軍嚴肅禁暴除殘民甚

悅之

明史一百三十四 舊一統志云大亨洞燭民情抑強扶弱剖決若流時市民失火無力搆屋大亨

給木助之民皆感悅卒於官民哀之如親喪

薛祥字彥祥無為人洪武元年授京畿都轉運使濬河

築隄自揚達濟數百里徭役均平民無怨言

明史一百三十八

案本傳祥治淮八年民相勸為善及考滿還京皆焚香祝其再來或肖像祀之時揚州直隸京畿故錄濬河一節

徐士誠定遠人洪武元年令興化集流亡闢田畝建官

署規制畢善創始之功至今賴焉

興化縣志

張遇林廬州人洪武元年知泰州撫綏郡境興俗更化創置衙署以學校農桑為首務境內橋梁坊巷無不修

復未久去官士民懷之不忘

泰州志

賈彥良定遠人洪武二年知儀真時師旅之後民俱流亡彥良招撫復業建學校創署廨庶政修舉廉明有聲

儀徵縣志

余奎浙江永嘉人洪武四年任高郵州同知公勤廉幹

卓有能聲後官至按察使

高郵州志

歐陽銘字日新泰和人以薦除江都縣丞兵燹後民死徙者十七八銘招徠拊循漸次復業民有繼母告子不孝者呼至案前委曲開譬母子泣謝去卒以慈孝稱嘗



治解後隙地得白金百兩會部符徵漆卽市之以輸明史

一百四十

謝文隆四川巴縣人洪武十三年知儀真賦役均平撫

民有方修養濟院以庇孤獨壇廟解宇多所建葺儀徵縣志

門克新鞏昌人爲泰州教諭秩滿來朝召問經史及政

治得失克新直言無隱授贊善見明史蕭岐傳

康彥民江西泰和人洪武二十九年知儀真崇學興賢

士習丕變邑始有登科第者修葺社倉平役弛利不以

察察爲治時稱其廉靖康熙志案彥民見明史吳履傳

儀智山東高密人洪武三十年任高郵知州廉能公正

勤於庶務凡農桑學校所宜興者無不畢舉高郵人皆

愛之曰知州長者歷官禮部侍郎雍正志事見明史本傳及山東通志

王思吳堡人洪武中以國子生擢嘉興同知調揚州所

至有聲後陞四川右參政明一統志

李義沛人累官儀真衛指揮僉事永樂初陞都指揮僉

事守眞州軍民德之旋以本官爲四川都司六年從黔

國公征安南戰死子敬襲官康熙志

呂童永樂八年知興化清正嚴肅力除吏弊人不敢欺

卒於官囊橐蕭然百姓治棺殮之里巷奠哭者千數興化志

縣志



凌鎬壽州人永樂間襲父都督爵鎮揚州時城郭多圯鎬節軍中浮費完築不以煩民且和輯軍民一時稱為

賢將

雍正志

周舟興化丞以績最特擢吏部主事民爭乞畱乃遣還

之

見明史吳履傳案舟舊郡縣志皆失載

何士英字子文東陽人永樂初知平涼府陞兩淮鹽運

使先是民苦部差督鹽課者所至苛擾及歲課孳生馬

駒賠納不及士英一切奏罷之

金華先民傳攷明喬字重遷董子祠記士英

於宣德間為運司

李貞海寧人宣宗朝為揚州知府三載章累百上民被

其澤考績入覲以疾乞歸謝還初所賜敕諭上曰知府

無與敕者與爾以旌賢也其傳示子孫以見朕優賢之

意既歸家徒四壁立

萬麻杭州府志

周忱字恂如江西吉水人進士宣德五年以工部右侍

郎巡撫江南督理糧儲始至即奏罷淮徐臨清三倉支

米轉運之法以祛領漕軍民之困於江都瓜洲江岸東

浚二港建便民倉於港側令每年秋末蘇松常三府各

運米貯倉及冬初領漕官軍駕船序泊瓜洲以待南京

戶部差官監兌其在淮安者亦如之定瓜兌正糧一石

與平米一石五斗五升淮兌則一石五斗運弁各出通



關回繳漕規稱便利焉又築石堤於瓜洲南岸俾運行者不苦淖濘造巨艦江上以救顛溺正統初淮揚被災鹽課虧欠救忱視之忱奏令蘇松常三府將餘米量撥一二萬石運赴各場聽竈戶以餘鹽估值領米於時米貴鹽賤民既得食官亦得鹽上下賴之後江北大饑巡撫王竑借江南餘米助賑始言三萬石公曰計至來年麥熟須十萬石即如數與之公前於瓜洲建置營築皆取辦餘米而不煩有司其通才大計為不可及如此

嘉靖志案周忱巡撫江南諸府並未兼轄江北景泰初江北饑王竑從忱貸米竑時為淮揚巡撫蓋明初江淮諸郡皆直隸南京未嘗有江南省之名所謂江南者實指

淮揚饑救忱巡視之文昇亦嘗奉使至此者故從舊志錄入

耿九疇字禹範河南盧氏人進士正統二年擢兩淮鹽運司同知節儉嚴介吏胥豪商凜凜不敢肆條奏鹽法便宜五事著為令丁內艱鹽場數千人走闕乞畱陞鹽運使已而被逮下獄得釋陞刑部右侍郎尋復出理兩淮鹽法兼江北巡撫官至南京刑部尚書卒謚清惠

編明史本傳云九疇節儉無他好公退焚香讀書廉名益振婦孺皆知其名李賢耿公神道碑云公進運使益循法責效廉名大著嘗坐水旁一童子曰水清不

如使君清公因號恒菴以自勵又案舊志載招撫流民乃鳳陽事今刪

刁駿鄆城人正統五年任寶應縣清謹有惠政卒於官



民甚哀之 寶應縣志

李光學湖廣武陵人正統五年以御史左遷令興化慈仁多惠政尋陞府同知仍莅縣事廳東有鶴乳三雛已將二雛去一雛病光學命療飼之愈亦飛去後偶疾思鰻魚不得忽有鶴銜一鰻投廳下烹啖之遂愈人以為

仁感云 興化縣志

葉思銘字克新浙江義烏人正統七年以前軍都督府經歷陞兩淮鹽運同知專理掣所事時耿九疇為運使同寅協恭釐姦剔弊不畏強禦後俱被讒逮繫上知其誣釋之復任思銘益勵清介以氣節自負不善事上官

故歷官六載而薦剡不及焉乞致仕未歸病卒其子卜

葬於揚之保障河旁 康熙志

王思旻湖廣黃岡人正統間任泰州判官政事修理吏畏民懷九載陞本州同知益加淬勵修州志建鼓樓遷驛為館造廣運望江二橋置預備倉廩八十間凡郡內事無不經畫盡善民至今德之 嘉靖志 案思旻見明史循吏傳

王竑字公度其先江夏人遷河州進士授戶科給事中英宗北狩邸王攝朝羣臣劾王振誤國請族振錦衣指揮馬順者振黨也厲聲叱言者去竑怒起捽順髮眾擊之立斃竑名震天下景泰元年命督漕運明年敕巡撫



淮揚又命兼理兩淮鹽課英宗復辟除名編管江夏天

順五年起故官復令督漕撫淮揚淮人聞竝再至歡呼

迎拜數百里不絕明史一百七十七 案舊志引名山

藏云竝撫淮揚值歲饑發廣運倉賑之所存活百五十八萬八千餘人

考明史乃鳳陽淮安徐州事今刪劉蘭字德馨浙江嵎縣人景泰四年授揚州同知時歲

歉民負租蘭白於巡撫請待來歲麥熟補徵從之仍行

鄰郡為例監修淮口鹽城潰堤及瓜儀閘壩俱工築堅

久漕輓賴焉命署府篆律已廉潔撫徠墾闢流通日歸

先是正統末調軍征閩寇暫借揚民運賦久不得復蘭

力白當道復之每旱齋禱輒應決理疑獄人服其仁明

會朝議裁冗員蘭在當去百姓白於巡撫王竝奏畱之

時竝馭郡縣嚴察所屬多望風去獨蘭得薦任九年以

老乞歸進朝列大夫嘉靖志

王漢贛州人景泰初任儀真知縣政尚和平歲旱禱雨

不應迺詣城隍告曰令之不德貴與神等今旱魃為虐

歲且不登令或不職甘罹其殃下民罔知胡足深罪遂

同鎖其項以示罰俄雨如注水平地尺卒得歲儀徵縣志

林聰字季聰寧德人進士天順初拜右副都御史捕江

淮鹽盜指揮吳斂受盜賂奏籍其家戮盜魁數人餘悉

解散成化二年淮南北饑聰出巡視貸漕糧及江南餘



糧以賑民德之明史稿一百六十

王恕字宗貫三原人進士由大理左寺副遷揚州知府

發粟賑饑不待報作資政書院以課士天順四年以治

行最超遷江西右布政使成化元年擢右副都御史遷

刑部右侍郎總督河道浚高郵邵伯諸湖修雷公上下

句城陳公四塘水閘因災變請講求弭災策改南京戶

部左侍郎明史一百八十二名山藏云恕知揚州府

再饑不俟監司報下輒發賑民既安阜乃選士教肄講

解課勞如張鼎高銓馬岱邱俊俞俊張銳輩後皆顯達

揚人比之文翁舊志載水災賑貸全活二百餘萬口乃巡撫江南諸府事今刪

王勤字而勉直隸武邑人天順間知揚州府平易簡實

愛民若恐有傷在任九年操持如一百姓至今頌之明南

揚璟河南鄧州人天順八年任江都教諭性惇謹學務

明理教以身先每夜課諸生誦讀仍置二生遞直雞鳴

起侍戶外候燈出輒隨往各齋驗諸生勤惰暇則籤召

諸生背誦經書或講說理義歷數年如一日諸生亦競

用奮起所藉成名甚衆人以此河汾湘湖之教焉萬麻江都

志陸朝璣江都志秩官表

姚綬字公綬嘉興人進士為監察御史巡鹽兩淮鈎剔

積弊准饑畫策賑濟流民賴以全活浙江通志



高明字上達江西貴溪人進士成化初歷遷右僉都御史時揚州鹽寇起守兵失利敕明勦捕明造巨艦往來江南北督戰又以方畧授御史戴琥顧以山擒賊九百餘人沿江高山置邏堡賊出沒露蹤跡不得逞有中官鬻私鹽明籍鹽入官劾之又劾戶部及巡撫縱法狀並陳利害十餘事俱報允一時風節凜然衆皆憚之

吾學編

明史本傳云明造巨艦名曰籌亭往來江上督戰

田瓊湖廣松溪人舉人成化四年爲揚州教授秉性剛嚴以師道自重雖謁臺郡貴官執禮不諂遇諸生恩義區別最明諸生由是奮激砥礪駸駸不懈常憫校生夏

易家貧捐資爲完其室仍誓誠同官母索寒士餽儀同

官胥畏服

萬姓統譜 嘉靖志云前瓊有訓導孫敏江西德興人其供職作士不減於瓊

趙憲直隸新河人成化四年知儀真縣政尙簡樸崇教恤民每出跨馬不乘輿諸生有貧甚者分俸給之任九載當代民皆遮畱巡撫奏聞詔加正六品俸仍知縣事又三年致政歸後憲南行過真民無長少咸迎拜道左牽衣挽畱居半載而還

儀徵縣志

吳廷鑑江西臨川人文正公澄七世孫成化五年知興化勤恤民隱會上官督征急歎曰吾不能以瘡痍事長官求好也力請寬貸坐是得譴去之日行李蕭然

萬麻志



周源湖廣武昌人舉人成化七年以御史出知揚州律身嚴潔不可干以私性尤坦直與士民語皆出誠心有訴外舅竊賣其幼女舅誣服後捕者獲女至乃幼育舅家其父自誘賣之釋舅而罪其父歎曰刑獄難得情實如此可不慎哉又有兄殺其弟者獄未決人報有二鷹相鬥俱墮城東水中指其處索之獲殺弟刀兄乃輸服時驚為神有內侍扈藩王就封過郡索物不得摔源辱之民頃刻集二千餘人隔河呼曰毋妄辱我公其得人心如此

嘉靖志

張錫直隸邯鄲人成化間以鄉薦授揚州府管糧同知先是豪右收攬小民糧價厚賂督儲者緩徵恣其侵剋故民稅完而國儲缺錫察其奸寘之法由是夙弊盡革糧以時輸一郡賴之錫莅下尤嚴終任吏胥未見其言笑自守以下率嚴憚之居官九載秩滿行李蕭然見者

歎羨

萬麻志

左輔永興人進士成化間知泰州外和內剛判決如流六載刑清訟簡庭無重辟歲致豐稔其創從祀賢像建州治皋門公館察院崇文鐘樓諸役皆無擾於民

泰州志

陸愈字抑之平湖人進士令江都三載均田賦抑兼弁清馬政恤貧民歲遭薦歉愈驗丁給賑民有鬻子女者



捐俸及官錢之羨贖還數百人仍給牛種散倉粟俟歲  
 稔平準收之督民開港以畜泄水利砌邵伯湖堤工雖  
 大而民不告勞又白於巡撫用歲辦餘銀置倉糴粟以  
 備賑江西多江南屯戍有翁子正輩聚無賴以戕人愈  
 單騎擒之復請立官橋巡檢司以控制焉節減沿河厨  
 傳以紓民力埋暴露遺骸嫁年幼尼僧憲臣清戎里書  
 畏刑多誣牽平民愈力辨免數百家造瓜洲閘導江水  
 以濟運舟尤篤意學校文風茂著百姓為立德政碑於  
 縣儀門嘉靖志 浙江通志云愈成化乙未進士知江  
 都縣窮鄉下里靡不巡歷殆遍月召有年德者  
 鄉一人詢民利

雍泰字世隆陝西咸寧人進士歷陞監察御史巡鹽兩

淮竈丁貧而鰥者幾二千人泰巡滿俱為完室而去吾

編事見明史本傳 見聞錄云泰既去淮人詠曰客邊  
 檢橐渾無硯海上遺民盡有家又曰了却四千兒女願  
 春風解纜 去朝天

陳志字惟學順天薊州人成化十四年知泰州能悉民

情革吏弊有築范公堤修學校復書院廣儲蓄諸美政

尤以勸農為先務其捕猛虎却飛蝗人皆稱異云嘉靖  
 志

案志見明  
 史李遂傳

劉廷瓚成化十六年令興化時堰堤久湮歲苦旱潦廷

瓚糾工築之踰月而竣民賴其利號曰劉堤學士錢溥



為之記 萬麻志

彭福字綏之江西安福人進士成化十九年知泰州賦性剛方不阿上官巡河使者令泰州月發濬夫三十名以代寶應役福堅拒之州北舊為監運鹽司址當事欲隳民居復舊司福力以小民安土重遷為言事遂寢額制歲徵給兵豆草民輸倉候支經年多腐責其償補福以折價請報可詔各郡縣遵行之民以為便 雍正志

吳嵩臨川人進士累陞揚州知府築隄以捍水患至今

祀之 江西通志

李紱山西高平人成化間任揚州府同知潔已愛民嘗

築堤復坍江田數萬頃又董開高郵康濟河挑揚州瓜

洲儀真運河當道旌保其績加四品服尋卒於官 明南畿志

萬福字季崇進賢人進士時欲釐正鹽法授福兩淮運

副分司故有歲例餘鹽盡革之又白督漕御史豁免各

場存積竈丁銀以甦賠累 江西通志

徐鵬舉字九霄四川瀘洲人進士宏治二年言者論運

司官僚當以進士為之遂授兩淮鹽運判官既至文采

政治煥然可觀建社學於所部鹽場延師以教竈民子

弟清蕩地集逋竈民咸安之陞太僕寺丞 雍正志

毛實字世誠浙江餘姚人進士宏治二年知高郵州下



車百廢具舉郵俗富而侈訟必行賄求勝實申嚴禁令  
 門無私謁有巨璫蔣姓者自南都來沿途需索少不遂  
 輒肆凌虐莫敢誰何實廉其舟中載物多違法先遣吏  
 邏得之蔣陽謝罪而陰挈其失以聞實抗疏自明朝知  
 其誣置不問高郵新開湖險惡舟行者每苦覆溺實白  
 於督河侍郎白昂奏開內河四十里以內艱去郵民立  
 祠祀焉高郵州志 案明劉健康濟河記實於宏治三  
 年與二府李紱同任浚河之役舊志作十四年  
 任誤今從張德盛高  
 郵志秩官表改正

白昂字廷望武進人進士宏治二年以工部右侍郎兼  
 右僉都御史治淮揚等處漕河昂奏分揚州管河通判

居瓜洲使軍民有所統一又奏濬瓜洲儀真壩口及揚

州灣頭運河親往督工又以高郵湖險舟多沒溺開內

河四十里以便牽挽工成上賜名康濟河至今利之嘉靖

志 案浙江通志云劉暉字公奇成化甲辰進士以御  
 史督兩淮鹽政築高郵湖堤四十里別為裏河名康濟  
 河豈是役暉實創之耶 又案劉健記昂  
 治河在宏治三年舊志作十年誤今改正

趙有初直隸沙河人宏治五年授揚州府管糧同知廉  
 恕有聲尋陞知府已戒行矣當道檄徵完任內逋課方  
 可其行有初行部至興化見積逋最多鞭笞號苦因垂  
 涕曰吾何愛一知府忍置汝曹於死耶遂棄官歸全活  
 甚眾邑人立像於西寶嚴寺中祀之萬曆志



畢亨字嘉會山東新城人進士宏治中由順天府丞謫兩淮轉運使亨有才望司事稱治暇則親詣儀真掣所擇端謹者令司衡纖毫不敢低昂宿弊一清尤留心學校賓禮賢才創正誼書院拔商竈子弟延師講學於中司西多隙地創屋八十餘楹給民分居又建白塔巡檢司儀准二所倉廩公署後官至工部尚書

雍正志案  
亨見明史武

宗紀

葉元字本貞江西貴溪人舉人宏治十一年授揚州府清軍同知性沈毅嚴恪不事姑息倣宋藍田考亭遺法立鄉約教民使崇善戒惡有蔡麒者稱皇親強奪民田元白之監司奏於朝歸田於民麒陰圖禍元竟無所得

後遷知雲南府

萬厯志

謝傑字洵卿福建龍溪人進士宏治十一年知泰州傑為治以興學作士為首務每朔望詣學設講議論根據理要士子環聽日昃不厭十六年夏秋亢旱田疇龜坼傑素衣蔬食徒步虔禱甘雨立至州人德之陞南雄府

同知

秦州志

張敷華字公實安福人進士歷右都御史總督漕運兼巡撫淮揚諸府高郵湖堤圯浚深溝以殺水勢又築寶應堤民利賴焉改掌南京都察院與林瀚林俊章懋稱



南都四君子就遷刑部尚書

明史一百八十六 名山藏云敷華督漕凡便益漕

綱者疏三四上權貴親暱干請拒絕頃督運入京諸大瑞雅聞敷華名因諸公送名香為壽敷華各報之幣既追反之曰幾誤平生吾素無內庭之交可自敗乎

房瀛字登之山東費縣人宏治十二年授揚州府推官

性峭直清介吏胥無敢索一錢聽訟一以理斷不畏貴

勢時以為刑官第一巡撫張敷華特薦之召為監察御

史萬麻志

李思文字宗稷龍陽人任曲靖教授改揚州揚俗侈靡

思文迪以古道作文津橋行冠射禮士風丕變時逆瑾

用事遣其黨采辦於揚思文曰是尚可以仕乎即引歸

杜門不出湖南通志 案舊志載儲備壩 文津橋記作教授李師文

夏有文浙江仁和人舉人宏治十二年為高郵訓導博

學有才作萬言書以獻名保豐管見孝宗覽之稱善良

久改曰保豐策高郵州志

馮允中字執之郴州人進士薦擢監察御史按兩淮振

憲度除宿蠹籍籍有聞繼按蘇松民咸德之賊瑾用事

怒其守正不阿矯旨逮下獄免歸因致疾卒在揚刻晞

髮集自序有君子嗜義而殞身小人貪得而苟免之語

人謂其允蹈之云嘉靖志

徐淮字必東山東武城人進士宏治十三年令儀真淮



性剛毅遇事敢為不避權倖真俗以侈靡相尚多挾倡  
優縱飲淮至著令禁之吏民畏懾雖貴家大姓亦自斂  
戢真境多中官出入索夫價為民害淮裁抑之璫不得  
逞忿愬于朝被逮邑中奔泣以送者千人斂金為贖淮  
卻弗受至京下獄科道交章辯救之得謫貴州按察司  
經歷陞僉事雍正志 儀徵志云淮至先定婚喪式禁  
民戢冠華裳釋道有私入民家及設齋醮  
者輒重治民貧不能娶者即為召女以所蓄雞酒送歸  
夫家徒娼優之居毋與民雜處令戶懸蘆簾以別之由  
是市無遊手民歸木業 明史許天錫傳云內使劉雄  
怒儀真知縣徐淮廚傳不飭愬之南京守備中官以聞  
逮淮繫詔獄天錫及御史  
馮允中論救卒調淮邊縣

歐陽涵字養性安仁人舉人知儀真縣歲旱竭誠祈禱

澍雨三日忽有一鶴自天而下馴擾於庭民以為清節

所感一統志

王恩字克承浙江餘姚人進士宏治間知揚州禮賢正  
俗禁部使無得侵民時歲直不登疏請移商鹽畱兌運  
用助不給隨以饑甚乃取貯庫解京馬價糴米驗口就  
給民賴以全者不可勝計遂自劾擅移之罪請俟豐年

徵解竟免徵嘉靖志

呂夔字祖邦廣信永豐人宏治十六年由進士以主事  
任儀真訓導時江淮旱饑瘠民斃踣者無慮千萬夔令  
貧民各得轉移力食所活甚眾創義塚分救坊衢日以



殍告昇瘞之又推行於瓜洲鎮瘞畢設祭泣動左右莅

真三年著有草堂餘興集雍正志 案夔陸師儀 徵志作任儀真分司

郭桂陝西咸寧人進士知泰州居官廉潔善斷每晨興

坐廳事獄訟頃刻而決公暇卽攜鋤灌蔬以自適其簡

樸若此考最擢鎮江府同知惠愛之政鮮有能繼其後

者州人至今道之嘉靖志

劉讓字堯仲江西新昌人舉人宏治中任兩淮運副居

官廉白取費於家以所得俸貲置祭田祀董仲舒雍正志

鹽法志云正德五年任未知孰是

粟補千戶交結權貴爲患邑中璽廉得其殺人攫財事

置之法同時有江都余某殺人埋其屍璽偵得之抵罪

佐守揚州宸濠攻安慶璽奉檄守儀真捕儀賓之爲謀

者十餘人敕旌其功浙江通志 嘉靖浙江通志云璽

活以內計 案宸濠反在正德十四年據舊志載楊一

清重 修揚州府堂記則是年同知爲畢璽因考喬宇重

遷蓋子祠記畢璽於正德六年已任 運司知楊記當爲孫璽傳寫誤也

孫祿字天錫山東棲霞人進士正德六年知揚州府性

剛直不阿凡政所當行者必行之雖違撫按重臣不顧

往來使客及諸璫貴戚裁省供應民以無擾有吏李宣

陰嗾朱寧使捕諸商挾以入賄祿不爲捕因逮祿及運



使呂賢畢璽赴詔獄祿挺身就械惟取俸資數金畱其半供母而行百姓遮道痛哭抵京有欲爲假貸以賂寧求免者祿不聽時運使及諸商厚賂寧獲免祿亦得還任入覲無一餽遺考最錫宴禮部加河南右叅政仍知

揚州後屢遷至都御史

雍正志 案祿 見明史劉瑾傳

陳憲河南西平人正德七年知江都縣操守清介剖決無滯會流賊齊彥名等由京口趨瓜洲勢甚猖獗憲隨事區畫爲守禦計甚悉時徵調官軍數萬頓城下費不貲皆辦自公帑未嘗斂民間一錢閭閻晏然若不知兵者秩滿陞鎮江府通判

萬麻江 都志

簡輔字汝欽馬平縣人由永新令謫判泰州性閎疎果毅遇事當爲者奮前不恤時論與決疑獄人多服之嘗建府館及各署理馬政永著定規正德九年浚東西市河商民稱便

泰州志

鄭傑字伯興湖廣廣濟人進士正德九年授揚州府推官開敏宏遠事無鉅細迎刃而解參伍律令必酌之民情獄以不寃自郡守而下咸資益焉屢遷至大理丞

萬麻志

彭應軫直隸獻縣人正德間知興化縣性豪邁尚氣節政務簡約吏不敢欺邑犬饑催科令急應軫詣巡撫乞



捐賦一年院使者陽怒欲下之獄應軫卽毅然禡冠服請就理使者乃爲奏報可邑人德之萬麻志

底蘊河南考城人正德十年知興化縣時民苦徭役一任糧長操縱無不破家者蘊奏除其弊民困以蘇後歷官至甘肅巡撫都御史興化縣志

成樂字以和湖廣石首人進士正德十年知泰州政尚寬惠德化大行操持清謹豪右請謁一無所假閱三載卒官至無以爲斂士民悲慟若喪考妣嘉靖志

胡堯元湖廣蒲圻人正德末以戶部員外調高郵丞時文游臺有老君堂堯元毀之祀宋蘇軾等四賢一日以

公事謁巡撫論不合卽趨出解組而行院使者追請慰留之陞瑞州府同知值宸濠之變倡義師克之官至尚

書高郵州志 案堯元明史 王守仁傳作通判瑞州

李文瀚字內英山西河曲人正德十二年令儀真爲政平恕嘗刻農書圖纂教民樹藝武宗南巡供帳萬億文瀚盡瘁經理境內賴以不擾及入覲左右有導以貨富

民財者厲聲叱之惟載簿牒以往以廉擢知商州儀徵縣志

蔣瑤字粹卿浙江歸安人進士正德時知揚州武宗南巡至揚瑤供御取具而已無所贈遺諸嬖幸皆怒江彬閉瑤空舍挫辱之會帝漁獲一巨魚戲言直五百金彬



卽昇瑤責其直瑤懷其妻簪珥袿服以進曰庫無錢臣

所有惟此帝笑而遣之府故有瓊花觀詔取瓊花瑤言

自宋徽欽北狩此花已絕今無以獻又傳旨徵異物瑤

具對非揚產帝曰苧白布亦非揚產耶瑤不得已爲獻

五百匹當是時權幸以揚繁華要求無所不至微瑤民

且重困駕旋瑤扈至寶應中官邱得用鐵絙繫瑤數日

始釋竟扈至臨清而返揚人見瑤無不感泣迨遷陝西

參政爭出貲建祠祀之明史一百九十四 萬厯志云

石以賑民獲甦聽訟不務深文輒諭遣去子弟欲取堂

上幅紙爲文瑤曰不可出數錢別市紙供之會武宗南

狩揚寮屬欲賦民免徵糧以供案既成瑤裂之曰民胡

可欺第從簡臨時利害瑤自當之此至諸瑤矯命欲刷

民間女瑤密命民室女將及笄者三日內盡畢嫁娶乃

復瑤曰民間無女不可刷惟瑤有女遠不可必至耳又

欲奪民舍以拓官店瑤曰民已安居不可奪瑤計皆阻

一郡卒賴以全及遷陝西參政夫婦覓一輕舸載原備

二衣橐以行官終

工部尚書諡恭靖

裴紹宗字伯修渭南人以進士除海門知縣武宗南巡

當道使署江都事時張忠江彬等橫索有司莫敢犯紹

宗獨與抗不少屈擢給事中會有大禮事紹宗抗疏辨

難下錦衣獄以掠重創甚卒貧不能治喪時稱忠靖渭

志 案紹宗事見明史毛玉傳 嘉靖志云紹宗

以諫死貧無以殮邑士大夫官都下者泣而賻之

李銳字抑之江西安福人正德十五年爲兩淮鹽運使

時鹽政大壞豪猾巨蠹率爭先罔利銳一以法裁之書



賸請託謝弗受諸豪譁然爲蜚語銳不爲動久乃帖服  
嘉靖元年入覲不持一物青袍角帶人不識其爲方面  
先後巡嵯御史各持意見銳與爭侃侃弗屈不合卽移  
文求去衙舍蕭然僅蔽風雨篋中惟故衣物而已

康熙志

謝在河南南陽人正德十六年知高郵嚴重廉明人不  
敢干以私歲凶多方賑濟州民賴以全活巡按御史委  
勘守備不法事相府遣人致書欲釋之在置不理卒正  
以法州有巨猾在列其罪白當道笞殺之一邑肅然以  
公帑羨餘置田八百畝名曰公田補官俸士廩之缺陞

荆府長史郵人肖像祀之

高郵州志

劉恩字以忠直隸高陽人嘉靖元年知寶應縣適邑大  
饑疫死者相藉恩力請當道發帑糴穀分委義民於各  
坊村設糜賑濟一邑賴以全活恩徧詢民間諸弊盡心  
釐革至今民思詠之

寶應縣志

易瓚字廷器直隸肅寧人進士嘉靖初知揚州府勤屬  
詳慎四鼓卽起盟榷味爽治事案無畱牘歲壬午癸未  
連饑瓚請賑於朝先召父老詣富室勸輸預集饑氓給  
以三月之食繼有旨悉蠲稅糧及發太倉銀米數萬瓚  
憂勞區畫躬行廩給又令僚屬詣州縣分賑全活者十  
九萬餘人貸種三萬七千餘戶後歷任右副都御史巡



撫河南萬麻志

何宏順德人舉人嘉靖三年補泰州學正方嚴直諒見諸生必公服以臨講誦不廢寒暑時郡大饑部院賑恤每令二生往監曰何公弟子必不欺也學行科條江北

稱最泰州志

雷應龍字孟升雲南蒙化人進士授御史嘉靖五年督兩淮鹽課禁私鹽先束官捕之倚法為奸者掣鹽不輕遣官以開弊門下令撤五司徒廟銅像改祀宋儒胡瑗毀州縣淫祠無數械治廟祝僧道擅左道惑眾者悉抵於罰士論稱快嘉靖志

聞人詮字邦正浙江餘姚人進士嘉靖五年知寶應縣值歲大旱運河水且涸漕運都御史檄公閉閘蓄水以通漕詮不奉命啓之曰民命甦吾獲重譴無憾也是歲旱不為災詮以邑有湖患力主開越河之議尋擢山西道御史奏陳開河事宜竟得請邑人祠之寶應縣志案詮雍正志

作銓誤

劉良卿新野人嘉靖六年以進士令江都有才幹治尚嚴察吏亡得為奸然不事苛刻民皆愛之後有曲江王維賢豐潤谷嶠其政蹟皆如良卿云萬麻江都志

周寵字君錫浙江臨海人進士嘉靖六年令儀真嚴肅



有風裁祛里胥宿弊清鹽商包索地租代償歲辦之賦  
審丁夫立九則一以宜民為本又毀淫祠正祀典範寺

觀銅像為文廟祭器治行著聞擢監察御史

雍正志案儀真志

云寵于嘉靖丁亥任乃六年也舊志作五年誤今改正

王臣字公佐江西南昌人嘉靖六年知秦州愛民如子

浚關河寬徭役移預備倉行保甲連坐之法撤淫祠毀

銅像以鑄文廟尊劍增修樂器選樂舞生供祀廟庭創

尊經閣立宋范仲淹胡瑗祠以化導斯民為己任政成

教行里巷皆絃歌焉

雍正志秦州志云臣起社學四所日端本慎初立誠養正

唐龍字虞佐蘭谿人進士嘉靖七年改右僉都御史總

督漕運兼巡撫鳳陽諸府奏罷淮西官馬種牛通泰二

州虛田租及漕卒船料民甚德之

明史二百二案本傳云龍居官著勞績

及為吏部尚書年老多疾為御史所論罷龍故與嚴嵩善龍之罷實夏言主之今節錄

王皞字天民安福人舉人嘉靖七年任儀真知縣以儉

率下諸淫費厲民者悉罷去又闢親民館講學其間或

集童子習所輯四禮俗幾無訟

儀徵縣志案明鄒守益重修儀真儒學記云

皞于嘉靖戊子夏任乃七年也舊志作六年誤今改正

岳東升字伯陽河南信陽人舉人嘉靖間令寶應地處

衝劇邑務蝟集每晨起聽事剖決如流午後公庭間燕

輒端坐吟詩吏無事可白綜覈嚴明人凜然憚之陞戶



部主事

萬麻志 案明朱日藩浚宋涇河記正統二年河決開毀九年詔修焉又八十餘年河復塞東升重浚之據此則東升為合當在嘉靖十年以前寶應志知縣表作二十七年任誤

侯秩字季常直隸長垣人進士嘉靖十一年知揚州府

性疑重不苟笑訾以勤儉率下節夫傳禁侈靡逐俳優

罪諸佚游者濬陳公塘以利民謂揚民無蓋藏乃多方

儲穀至數十萬庾廩莫能容斷訟不數言而決雖重獄

未嘗淹旬月他郡民有與揚民爭沙田者殺揚民且誣

以罪其有司亦庇之秩會問執法忤其意遂妄奏秩罪

適當路有怨之者共文致之巡按御史為白其事得還

任秩不媚權貴私謁不入門蝗入境輒散不為患歷遷

陝西參政

嘉靖志

范總字平甫其先樂平人遷瀋陽進士嘉靖三年伏闕

爭大禮下獄廷杖由戶部郎中歷遷兩淮鹽運使條上

鹺政十要遷四川參政

明史一百九十九 康熙志云總遷四川參政當行商民遮送

塞路有泣下者或念其貧懷金走數百里贈之總絲毫

無所取眾復歎惋乃相與立祠城南肖像祀其中

相范公祠記云公莅政之初鹽法敝壞公殫畢心力日

夜講求蹟隱沿海地頻年災丁竈困陪公撫摩若嬰孺

賑集轉徙派分逋負寬免重役草澤訴訴若再生踰三

年政大洽上下胥利人頌之曰范來早我人飽范來遲

我人 姚旭字景陽自湖州徙石門官高郵州判一日行堤上

會風起湖中覆船多溺死者乃匍匐召水工救之生者



給衣襦流屍葬之城北原上是時全活以貲還者幾百人葬者倍之道路皆咨嗟感涕

浙江通志

鄧繼曾字士魯資縣人進士嘉靖十二年任寶應縣風裁英赫不畏強禦吏事精敏案無滯牘使客往來供應

率裁其半無敢繹騷者

寶應縣志

傅珮字朝鳴浙江仁和人嘉靖十三年令興化興邑賦重役繁加之軍竈錯處鄰疆侵奪民大困珮力請之巡按御史洪垣均田平賦民困少甦又白當道減站役三十名民兵五十名歲省貲千計徵入為兵科給事中

萬曆

志

鄭漳字世績福建閩縣人進士嘉靖十六年任兩淮轉運使時海潮漂溺漳親詣亭場收諸死於水者櫓而瘞之又請於巡漕御史吳悌焦璉畱羨課數萬金以賑且為築避潮墩於各團亭民存歿咸賴焉官至應天府尹

雍正志

吳悌字思誠金谿人進士出視兩淮鹽政海溢沒通泰民廬先發漕賑之而後奏聞悌為王守仁學然清修果介反躬自得為多學者稱疏山先生

明史二百八十三案明張憲開市

河記悌於庚子歲簡命清理鹽政乃嘉靖十九年也鹽法志作十七年誤

張準江西德化人舉人任寶應令守官廉謹敷政平易



節省財力民以不擾考滿陞雷州府同知

寶應縣志 江西通志云

縣衝疲多水患準築隄安民至今有張公隄

鄭聚東四川廣安人嘉靖二十八年守高郵能以鎮靜處煩劇日擁百務剖決如流無怒容邊色不輕笞一民民亦不忍欺之居官一年以內艱去百姓泣送者萬計遮道不得前自晨至日中始達郭門父老以為百年僅見也三十三年服闋補山東泰安州郵民伏闕乞以聚東仍守高郵泰安人聞亦赴都爭之下吏部議以既拜命不允郵人有東南借鄭錄

萬厯志

吳桂芳字子實江西新建人進士嘉靖三十一年知揚

州府初至郡有水患請發賑蠲稅百姓德之及倭寇江北桂芳募練鄉勇懸賞格以簡拔將校守禦之策無不備具為沿海州縣築城濬隍俾民依城保聚倭至得免焚掠又採郡人何城議以揚州鹽課當天下財賦半而商人居舊城外非計請於巡按奏築外城議甫定擢臨清兵備不果後守石茂華至竟其事桂芳才敏而事勤在郡政績甚著有守揚疏議四卷行世

萬厯志 明史本傳云萬厯三

年冬桂芳總督漕運兼巡撫鳳陽以淮揚洪潦奔流惟雲梯關一徑入海致海湧橫沙河流泛溢而興鹽高竇諸州縣所在受火請益開草灣及老黃河故道以廣入海之路修築高郵東西二堤以蓄湖水皆下所司議行未幾草灣河工告成六年詔進工部尚書兼右副都御史卒尋以高郵湖堤成贈太子少保



樊城江西豐城人嘉靖間爲泰州學正講學課藝士皆  
悅服州學舊有田久廢城力請之監司以贍士攝州篆  
州人愛如父母海安鎮舊無城時倭寇方熾議建城巡  
撫唐順之檄城往營度城聞命疾馳赴鎮集居民宣恩  
威諭禍福衆力競勸不二旬城成順之及副使劉景韶  
嘉嘆之未幾轉官桂林景韶欲畱參幕府將具疏以請  
力辭歸

康熙志

張景賢四川眉州人進士嘉靖三十三年以倭寇日警  
始設海防兵備副使以景賢爲之甫任倭大至環甲督  
戰重懸賞格募死士授以火攻方畧一鼓殲之綜核振

刷軍政肅然暇則崇文興賢獎進後學揚人感之不替

官至都御史

康熙志

崇禎秦州志云嘉靖三十二年倭犯江淮始設海防兵備道一員駐秦州

石茂華字崇質山東益都人進士嘉靖三十四年知揚  
州府性簡默持大體值倭寇作羽書旁午從容應之不  
動聲色而事辦登陴勞士夜不歸廨食寢與俱已而倭  
退踵前守吳桂芳議築外城捍環河商民畫地授工畚  
築之事皆親爲籌畫民爭趨事九閱月告成明年倭寇  
復來望之引去至今呼爲石城累官至侍郎

萬曆志

朱公節浙江山陰人嘉靖三十四年知泰州繕城郭浚

河隍倭寇不敢窺伺悉捐不急之征卻常例千金清白



之風至今稱焉

泰州志 案公節字允中見江西通志 崇禎泰州志云三十五年任未知孰是

胡順華字賓甫湖廣武陵人嘉靖三十六年令興化時

倭寇竊發順華嚴號令鳴刁斗日夜巡城為備禦計賊

謀知之不敢犯順華乘暇大繕城垣費百萬緡不扑一

人而民勇於趨事在任五年陞南京兵部主事

興化縣志 宗

臣祠記畧云公任興三月倭寇將逼邑城且圯邑中人

惶急乃下令日無懼於是積薪粟精器械募千人督練

為戰守計自衣戎帶劍登城周視每夜分方罷漏下五

鼓則又束帶坐堂上簿書盈案決發如流如是幾兩月

興之人恃

為長城云

金克厚浙江仙居人王守仁高弟言動必法聖賢嘉靖

間以工部主事督河高郵自奉甚儉繩吏書以法以治

河勞瘁卒於官貧不能備棺殮郵人至今稱惜之

高郵州志

趙訥字孟敏山西孝義人進士嘉靖間令江都警敏有

吏幹政務大體多所興革尤留意里甲先後裁縮公私

諸費數千計時河堤善崩運道湮塞有議開花園港建

閘以洩水者訥謂不若浚白塔河便白諸監司謂浚河

工省而利溥建閘費夥而事難監司從之興化故苦賦

重欲分之諸邑訥上牒力爭言甚剴切事乃寢江都以

郡附郭無志訥始採葺成縣乘焉

萬麻江都志

司治直隸內黃人嘉靖中任興化丞常俸之外一介不



取民有遺餽堅卻不納去之日士民設帳滄水以紅錦袍加其身觀者如堵曰自有丞以來未有如此君者萬麻志

李瓚字獻夫江西豐城人舉人嘉靖間任寶應老成廉

靜以誠待民召訟者至前道以禮讓人咸感悔訟為清

簡每春日勸農躬詣隴畝有古循吏風在任三年五祈

雨雪皆應禱立至人以為善政所感萬麻志 寶應志 云瓚莅邑三年數

罹水災瓚不忍催科歎日願以身當之遂左遷忻然歸田里畱詩誌別去後邑人思之為建祠以祀

姚筐號龍津平湖人知泰州招集流亡墾闢田畝裁省

冗費威讐吏胥慨然以興學自任優文行調貧乏拮据

資商羨糴米三百石建義倉於學貯之以貸諸生每石

加息米二斗歲計得息米九十石以充公費仍存本米

貽來歲傳之無窮後為師生乾沒盡廢泰州志

申嘉瑞字叔獻河南葉縣人舉人嘉靖四十三年令儀

真政尚嚴肅清操凜然一時奸猾震悚又周知民間利

弊力為釐剔開書院刊縣志善政多端民立祠祀之儀微

縣志方九功字允治河南南陽人進士嘉靖四十四年知江

都縣江都當南北孔道諸費咸取辦里甲每九月為更

番後累費幾二萬餘九功為通融酌減所存者二十之



五船馬夫頭減十之六月夫踐更減三之二居江都三歲歲費省至數萬流亡者悉還業

萬麻江都志

歐大任字楨伯廣東順德人嘉靖末為江都訓導學甚該洽坦率無城府人皆樂與之游時博士業日趨靡陋大任始進諸生授之史漢文選士彬彬知嚮慕古昔談經之暇與諸生倡和為詩號竹西社隆慶初御史檄纂世宗實錄因採廣陵賢士大夫為十先生傳又有浮淮

輶中二集 萬麻志

李戴河南延津人進士隆慶初知興化縣廉明仁恕加禮學校士有貧不能舉婚者捐己俸助之己巳淮水漲邑幾沒戴多方拯恤力請賑蠲全活甚眾又乞具題減稅糧數萬石既徵拜禮科給事中猶移書當道為民請命民有陳奏皆極力維持務期得請屢諭父老書戒勿輕去鄉井讀之者皆感泣官至吏部尚書

興化縣志案戴字仁夫

見明史本傳

傅希摯直隸衡水人進士隆慶三年任揚州兵備道時倭寇蹂躪之後邑井蕭條守禦闕畧希摯相度江海險要於廖角嘴等三十六所增墩臺備器械募竈勇開屯田以給軍糈倭氛遂息歲值大水力請蠲租民咸德之屢遷至總河少司空築樓子莊高寶湖堤平水諸閘河



流安瀾至今為利入為戎政尚書

泰州志 案希學 見明史 吳桂芳傳

陳耀文字晦伯河南確山人進士隆慶五年為淮揚兵備副使時倭寇甫平境有巨猾乘亂嘯聚數千人盤據窟穴曰史家莊曰灰廓村曰樊汭而據史家莊者尤驍黠江上劫掠商賈官軍不能制其黨有密踰城為謀者有司捕械至耀文亟釋之誘以重賞令過史家莊給其賊曰官兵盡解散矣賊信之弛備耀文勒士卒銜枚夜搗其莊盡格殺之餘黨奔潰自是諸村落悉安耀文學問淹博於書無不窺覽所著有天中集二百餘卷正楊

四卷 萬縣江

唐邦佐字中廓浙江蘭谿人進士由如皋縣調知儀真時歲賦民間架錢十萬七千及造舟築堤費苦不勝邦佐以官稅之羨代之舟堤均之各邑民困以蘇明敏善斷疑獄中都婦誣富人殺其夫坐辟臺使以屬邦佐訊邦佐閱爰書怒曰此婦實殺之夫脇骨三折當暴死安能行五里許而歸婦具服嘗避雨僧寺雷電繞之遂留宿夜夢被髮血淋漓者走至樹下沒詰朝集寺僧伐樹得死男子則夫與婦行過寺寺僧搥死夫瘞之婦尚在於是誅僧而瀦其居又嘗雞鳴出郭門見婦人散髮溺水者決水得死婦則悍妻妬妾殺而沈之坐如律時稱



神君治行爲江北最重書賜金褒勞以不能阿邑權貴  
僅擢刑部後與同舍郎謀劾江陵相奪情宵人中以計

典去

儀徵縣志

李涑雩都人進士授寶應知縣時倭寇之後繼以水患  
田日荒蕪涑招有力者墾種開墾濬河以濟農事王野  
鄉荒甚分其糧於三十里俾無偏累腴田悉歸他郡豪  
右涑曰田我田役我役差徭無曲貸焉又請於上官停  
徵三年民力漸紓凡治寶邑七年擢戶科給事中猶陳  
寶邑水利五事後轉山東僉事歷應天巡撫都御史

寶應

縣志

案涑見

吳顯字景猷福建漳浦人進士萬曆三年以六安州調  
守高郵至卽修築老堤又濬越河慮河勢衝徙徧植楊  
柳於左右岸三堤屹然勞績最著州故四達要津民力  
凋敝顯盡革例耗與民休息以供帳不具獲罪監司程  
學博程楚人江陵相腹心乃嗾直指中之直指過郵見  
頌聲載道反器重焉時江陵方厲驛禁其太夫人公子  
八都道出郵役驛夫八百名計費金數百顯不應曰是  
奉相國法不敢糜國帑也其從者據署詬誶誘顯登舟  
忽出數婢奪顯印入顯卽欲解組行直指監司聞變夜  
馳至郵返所奪印太夫人入都陳郵守抗窘狀江陵爲



之矍然遷刑部員外輕車就道行李蕭然民為罷市先是郵人以河隄功欲尸祝之顯臨行戒勿祠僅立去思

碑云萬麻志 高郵志 秩官表云 萬麻八年任 考程學博於隆慶六年任 海防道 萬麻五年去任 張居正

母於萬麻六年入都則 舊志作三年者是也

蕭景訓號抑堂江西泰和人進士萬麻三年授泰州知州政尚明決不可干以私憫州地鹵瘠民為他邑分任

徭役再三請罷之作平役錄約佐貳毋得受民詞兩造

在廷剖斷如神吏胥奉簿書惟謹田賦令民遵期自納

不知有追呼之擾每公暇輒召士講藝以為樂雍正志

況于梧字汝材高安人舉人授天長知縣調儀真時淮

水泛溢大為河患遂開便河修築高家堰陞嘉興府通

判以河工未竣改淮安竟厥功居民號況公河江西通志

韓介臨淄人進士授寶應知縣時有旨丈田未三月遂

竣事請於督河侍郎大濬支河民便之會開越河有事

河工者官役甚眾介曰若責供頓於民民何以支白督

府罷諸執事供頓工竣民無擾焉塞便益門開迎秀門

邑科名遂盛寶應縣志

陳邦科高安人進士萬麻九年令江都時奉檄清丈田

畝邦科分三等九則徭役稱均其聽訟務虛心諦警弗

任喜怒治江都六年所論死者一人繫室空虛幾致刑



措初廟學蕪圯下車首修葺之諸生貧者時周給焉後擢御史歸起為河間太守道出揚州百姓扶攜老稚瞻拜咸喜曰我公肥白勝舊日也胥吏臺輿郊送之數十里洒涕而還先是邦科去江都士民買地建祠為碑紀德繼至者為劉道隆官箴吏事亦稱最江淮人為之語

曰前有豫章後有潛江事見萬麻江都志

趙慎修字敬思膠州人進士知揚州有廉聲築大隄三百餘里漕舟民田兩得其利山東通志

李裕黃岡人舉人萬麻十一年知泰州時興泰久被水患士民訴諸巡按請開海口民有豪而黠者居鹽場數

盤據善因緣為姦詭言開之將不利竈與商且啓海寇

窺伺心眾聞之議不決裕曰州歲賦六萬石民不有田安所從賦也事急矣脫不幸有他請以身任之即駕小舸涉海上周覽咨度具其事宜于牘辨析數百言巡按以聞於朝凡所建置具如其請自是水有所歸阡陌皆復民甚賴之事見陳應芳浚丁溪場龍開港記

文在中陝西人進士授儀部主事以言事謫泰州同知丰裁峻厲不畏疆禦城社之蠹靡不望風匿影而保民如嬰赤尤重學校士貧不能自給每捐俸以助二年仍陞主客司主事泰州志



蔡時鼎字台甫漳浦人進士授御史巡鹽兩淮悉捐其羨爲開河費置屬邑學田以事謫馬邑典史歷南京禮部郎中卒官貧不能含殮士大夫賻而治其喪明史二百三十一胥遇字際明四川眉州人進士萬曆十三年任海防兵備道初至首問疾苦知水患最困卽檄守令分勸下流海口壅闕則東濬三場穿范堤達苦水洋牛灣河北疏兩河從葫蘆港戛糧河達新豐市入海上流湖水泛溢則闢惠政橋引趨芒稻河南注於江受期興役次第竣工民賴其利泰州城以霖雨崩圯遇庀材鳩工夫役取之召募銀粟取之公帑不括民一錢睥睨屹然陞滇南廉使郡人立碑記之泰州志

王可江西人舉人判泰州公明坦直衆不忍欺職在督糧念州民疲敝征科從緩操履清白卽常例未始一染指及陞任奚囊罄懸惟一鶴伴輿而去泰州志

耿隨龍直隸滑縣人進士授寶應知縣邑屢罹水災民不堪命最患苦者曰坊長里長厥頭諸役隨龍盡罷之民困大蘇邑瀕湖歲派夫三百四十名隨龍請官銀募夫歲省民白金數千兩故事僉富民採辦河工物料民多賠累隨龍悉令官辦民得無擾凡諸便民之政皆請於督撫勒石著爲令更爲善人無後者置妾貧士露處



者治居年長不能婚嫁者給以貴老而饑者日給米一升治絮衣以衣驛徒之凍者治寶邑五年皆實心實政人人俱被其澤既考選戶科給事中會朝議開周橋隨龍上書陳不可狀事得寢其不忘寶邑如此

寶應縣志

譚默字仁卿廣東仁化人舉人萬曆十四年知泰州先是河囓田苗盡損勘災吏至署篆者慢不理恚去以輕災聞檄徵賦如常民不聊生默至撫慰曰吾終不令若斃於征輸已運艘抵郡催漕火迫默控之當道請出倉中陳穀及貸嗟金若干兩以糴臺使者有難色默泣請不已乃爲疏請得報可漕以獲竣明年春民苦艱食默設粥以賑全活者萬計城頽約五百餘丈工費無所取給命牙僧納錘給帖以庀徒庸令饑氓失業者供畚鍤之役城完而民無轉徙其善籌荒政若此姜堰盜起默不爲張皇懸賞購得渠魁一二人脇從者星散秩滿遷

南寧郡丞

康熙志

周夢暘字啓明湖廣南漳人進士萬曆十六年任海防兵備道修明軍政釐革宿弊嘯聚萑苻者皆望風匿去憫泰州田賦獨重民不堪命力請蠲折數十年逋累一旦盡除暇則與郡多士講課文藝衡鑑公明士心悅附

泰州志

重刊易州志

卷之四十四

宦蹟二

四



歐陽東鳳字千仞湖廣潛江人進士萬厯十七年授興化知縣時大水壞堤東鳳屢以蠲賑請於上官不應卽自草疏上之言甚切以越奏停俸然卒蠲積逋改浮糧

二萬石折銀一萬兩如所請既去民思之不哀

興化縣志

東鳳事見明史顧憲成傳

又案舊志作十九年任興化志職官表云十七年據演武場注云萬厯十八年歐

陽東鳳重建則九字之誤無疑故改從表

吳秀字平山浙江烏程人進士萬厯十九年知揚州府下車首請復五塘當道難之卽日攜家去士民遮道號呼闕聞監司爲請於朝塘復其三城內市河闕淤新城

北隅舊無壕秀挑北隅之隍若干丈引官河之水注其中濬城內河之淤者與新隍之水接臨流闢城門曰廣

儲門內建糧倉外築梅花嶺二城水相縈帶舟楫稱便會倭寇犯順秀儲穀練兵樓櫓戰具悉備吏胥僉報大戶以備城守秀叱止之民不擾揚舊有承值舖戶應諸司之求秀斧其碑與民平價商賈大悅居二稔郡大治

晉興泉泉憲

凌儒遺愛碑畧

羅文翰湖廣沅江人萬厯間授高郵州判官專治河事甫抵郵半月泗水大漲運隄崩潰郵之清水潭最爲要害至是決百餘丈文翰奉檄督修胼胝盡瘁築工未就親至決口指麾夫役溺死隄下潭深湍急覓其屍不得



州人悲之

萬厯志

陳燧山陰人進士授寶應知縣時淮水漲泗州為陵寢患朝議開周橋洩淮戶科給事中耿隨龍愕曰如此則無高寶矣上疏陳不便狀帝遣工科給事中張貞觀相視形便燧繪圖獻且極言其利害議遂寢燧繼耿隨龍後治行卓犖見稱於時嘗入鄉賢祠欲撤陳琳位亦可知其為人已

事見寶應縣志

劉應文直隸東光人萬厯二十一年授泰州知州居官廉惠常俸外一毫不苟取嘗天寒思煖耳宦家子持紫貂獻之應文斥不受尤平易近民不事錡箭兩造相訐者徐為開諭各輸服而去先是州竈戶糧輕徭寡奸人多竄入竈籍以避役大為民病及催科令下竈戶不赴而保家者代為輸官胥吏交窟穴於中長吏不能詰恣其乾沒及逋課莫出則往往責代償於民應文洞晰其弊請於當道初狃成議意難之奸竈又膚愬於巡鹽直指右竈而左民議幾格應文率士民力爭之年餘然後報可分竈與民為二令鹺司徵竈糧而州徵民稅始盡祛積弊民得更生邁疾卒於官啓其笥止敝衣一襲備兵使者哀而棺殮焉櫬歸之日邑士民哭聲震地舟過西雙廟猶有環棺泣送者

康熙志 崇禎泰州志云二十年任未知孰是



張寧字坤一襄城人進士萬厯甲午為江都令會平會  
訂朝鮮諸邑戒嚴寧日究方畧務為鎮靜封內晏如俗  
故健訟率片言折之白黑洞晰兩造皆欣服尤不易被  
人罪終五年未嘗論一大辟訟牒有所勾攝署其名付  
訟者與之期再渝則始遣隸逮及對簿日版其名次以  
召雖丙夜必竟其事以故案無滯牘邑所急者河隄洲  
田寧劑劑調停公私務得其當家人日飯脫粟歲時餽  
遺無厚薄卻之陞南京刑部主事去士民遮轅泣送道  
為之塞事見萬厯江都志

翁汝進浙江寧波人進士萬厯間授興化知縣汝進長

於吏治遇事立決邑無冤民時河堤屢潰督河使者議

開海口知汝進才委以相視汝進乘小舟率父老自丁

溪諸場至石礎口歷岡門界河徧唐河神臺射陽湖察

形勢辨利害詳其曲折以報今所傳景范堂治承圖議

談水利者奉為著龜焉康熙志

李誌字廷新浙江縉雲人進士萬厯二十六年巡撫兩

淮誌保釐凋瘵加意撫恤繕營房百五十間不役一夫

日自有分番之伍可用也以朝命中璫出督商稅誌上

疏力爭詔令致仕人咸惜之泰州志 案李誌事見明史李三才傳是時淮揚巡

撫移駐泰州故錄誌三才二人



楊洵字暉吉山東濟寧人進士萬厯二十六年知揚州  
 為清白吏第一時瓜洲稅使肆虐商民猝聚至千人  
 詈侮稅使擊斃其爪牙洵至諭以數語輒立解散揚營  
 兵及瀕江屯戍餉數萬金取自府帑豐入嘗出洵革其  
 弊出入如一闢崇雅書院躬自訓士與往復辯難不倦  
 二十九年遷揚州兵備副使先是興化水溢洵議疏鹽  
 城故河以殺水勢守淮者執不可至是力甲前請竟得  
 如議時罷漕撫令河臣駐淮半歲分莅於濟移撫臣駐  
 泰州洵上記直指謂河臣駐淮位望雖崇而責任不專  
 何以督漕撫臣駐泰鞭長不及宿兵無可之地均不便  
 直指特疏上聞復設漕撫如舊尋參藩出中以母老乞

休再起淮徐踰月致仕揚人祀之名宦  
由水熙志 案罷漕撫事明史職

官志文不備

李三才字道甫順天通州人進士萬厯二十七年以右  
 僉都御史總督漕運巡撫鳳陽諸府時礦稅使四出三  
 才所部權稅則徐州陳增儀真暨祿鹽課則揚州魯保  
 蘆政則沿江邢隆棋布千里間延引奸徒偽鑿印符所  
 至若捕叛亡公行攘敎而增尤甚數窘守長吏獨三才  
 以氣凌之裁抑其爪牙肆惡者且密令死囚引為黨輒  
 捕殺之增為奪氣然姦民以礦稅故多起心為盜三才再



疏陳礦稅之害言陛下愛珠玉民亦慕溫飽陛下愛子孫民亦戀妻孥奈何陛下欲崇聚財賄而不使小民享升斗之需欲綿祚萬年而不使小民適朝夕之樂自古未有朝廷之政令天下之情形一至於斯而可幸無亂者疏三上皆不報尋引疾去

明史二百三十二

張可大字觀甫應天人世襲南京羽林左衛千戶遷浙江都司僉書分守瓜洲儀真大盜斂迹稅監魯保死淮撫李三才令可大錄其貲保家餽重賄不受葉向高赴召過儀見而異之曰此不特良將且良吏也

明史二百七十一

趙良相湖廣衡陽人進士萬曆三十五年知揚州府廉而有威郡有梟猾數人披猖市井間為良懦害良相立

捕置之法樹榜其門以戒里人終其身不敢犯決諸生

中某當大魁果以館元登侍從時服其藻鑑

康熙志

姚祚端浙江烏程人進士萬曆間授江都令公恕廉敏

政無冤民催科不擾城東北隅有石人長二尺許砌市

墻內黃冠詐云有靈祈禱奔走填咽衢陌通國若狂祚

端碎石人而懲倡妖者人服其正直五載政最召為御

史

江都縣志 考湖州府志祚端字正初萬曆丁未進士乃三十五年也陸朝璣江都志云三十二年任誤

王之臣字任吾陝西潼關人進士授諸城令以阻稅使

謫判泰州狷介自持職司漕運省耗米革常例設立規



程州民稱便其聽訟不苛有犯者辱以蒲鞭而已尤喜  
接士竟日談文亶亶忘倦州守酷虐無辜冤慘之聲不  
忍聞遂飄然解組明哲高蹈人以爲難後累遷巡撫宣  
府僉都御史

秦州志

王伉字韋軒四川潼川人進士萬厯三十七年由蒙城  
調知儀真真邑多巨猾奸黠者夤緣充胥役專爲羅織  
罹其毒輒破家伉入境指名捕之立榜死肆諸市奸人  
屏息尤善斷疑獄人疑其神時江北四郡凡有冤滯愬  
兩臺者悉求就伉理讞無不得情而去入覲遷吏部驗  
封司主事後以開府六詔終

儀徵縣志

熊尚文字思誠江西豐城人進士萬厯三十八年任備  
兵副使清剛廉正約已崇儉官舍中竹籠布袍而已時  
倭寇猖獗尚文以廖角嘴爲海濱要地設屯練兵名新  
義營會倭寇掠掘港場泗港口羽書旁午尚文靜持之  
密偵得其情選銳疾趨不踰時而羅致麾下尚文念秦  
州民溢徵爲累嚴示裁禁歲免銀七千兩有奇凡公費  
可節省者皆酌減刊賦役成規迄今遵行之暇輒偕諸  
生詣安定祠講學士風一變後累官兵部尚書

秦州志

余文燿四川長壽人進士萬厯末知江都縣性嚴重持  
正不阿居心坦恕不鍥急爲治每向夕端坐竟夜不寢



勞心民事仕至南大理寺卿

江都縣志

崔國裕陝西長安人舉人萬厯四十二年授秦州知州在任五載以撫綏爲事催科不施鞭扑輸者恐後凡厥里徭役杜胥保侵漁之弊民無重賦州有夙逋悉爲請蠲編審里甲公平允當招徠流移至四千餘戶邑人祀之名宦

康熙志

鄭國俊字養冲山西解州人進士萬厯四十四年授海防兵備道揚故利煮海私鹺不可詰當事者議報溫飽之家令出資買引置鹺而市於民比閭稽戶口給票買之以杜私販國俊具陳不便狀議遂寢民以無擾他如警備員之闕葺覈賊吏之侵牟善政不可枚舉郡人立

石誌焉

秦州志

韋宗孔湖廣黃岡人舉人萬厯四十七年授秦州知州前守酷設板屋以繫囚慘於囹圄宗孔至立毀之時歲苦旱次年復患潦漕米無出宗孔力請改折民賴以甦莅州四年釐奸剔蠹城社一清秩滿遷桂林府同知郡人德之立祠以祀

秦州志

于覺民號任所陝西醴泉人由選貢萬厯四十七年判秦州三年艱歸囊橐如洗其撫字德惠載在人心闔郡士民懷之因鐫清正父母于公去思碑於迎恩門側

秦州



遲大成山東萊陽人進士天啓中令江都儀表偉碩望之肅然嚴以律下寬以馭民尤接士有禮雖簿書填委必公服乃見剛毅精敏數年如一日入爲御史巡按應

天廣西卒於官

江都縣志

向孔門字二丹湖廣宜都人以孝廉令寶應天啓六年知泰州釐奸剔弊吏胥束手發伏如神境中有麥秀三歧之異盜王虎子爲亂白晝戕人捕役結爲腹心無敢聲言者孔門刻期擒獲安豐士民立祠祀焉

泰州志

李學旻字本仁江西臨川人舉人天啓中知泰州泰壤多鹽場濱海盜藪有巨豪爲之窟穴學旻設計擒其魁

脅從解散境內以安在任一載爲含沙所構被劾去官

士民號泣奔送者百里不絕後州人思之追祀名宦

康熙

志 江西通志云學旻守泰州革鹽稅築隄壩以杜水患

王績燦字璇觀江西安福人進士天啓五年知興化縣

勤政寬賦不事束濕與人交樂易可親及以私干之則

辭色毅不可犯秩滿擢爲御史

康熙志 明史吳執御傳績燦以治行高等擢

御史有聲

來復字陽伯陝西三原人進士天啓七年授海防兵備

道時璫勢正熾有胡劉二闖踞郡以檢括欽贓爲名怙



威張甚復正色弗爲禮二闖恚至惡聲肆詈復抗不少  
挫未幾魏忠賢敗悉按治其黨寘於理復善治兵多方  
畧信賞必罰海上有大盜聚衆數千有司不能詰復縱  
反間離其黨與渠魁就殄又捐俸葺城迄今賴之

康熙志

王徵字良甫陝西涇陽人天啓間爲揚州府推官值三  
王之國從者徵求百出民不堪命徵挺身白王王飭侍  
衛者毋得擾揚境及闖魏忠賢竊柄構黃山獄連巨室  
數百人黠者乘機構煽人皆側目重足徵毅然曰某在  
必不廢法求媚其容斷斷者刀俎良善耶力爭之當事  
卒不能奪時建魏瑞祠成徵與淮海道來復獨不往拜  
人稱爲關西二勁尋爲山東僉事崇禎十七年賊李自  
成據關中徵絕粒七日死

康熙志

王象晉字康宇山東新城人進士崇禎間任揚州兵備  
副使摘奸剪慝十城憚其風采時巨盜王虎子嘯聚海  
濱剽掠殺人象晉設方畧擒斬以徇暇則招諸生闡發  
經旨亶亶不倦持己清肅圖書而外泊然一無嗜好遷

蘇松糧儲參政

江都縣志

金鉉字伯玉武進人進士爲揚州府教授日訓諸生闡  
濂洛正學燕居言動俱有規格諸生嚴憚之

明史二百六十六

許其進字孔與東昌人進士授廣陵司李冰蘖自矢獻



獄平允案無留牘有妖僧為亂以計禽之一郡賴以無

事 山東通志

趙虞佐陝西涇陽人舉人崇禎間任揚州同知吏治明

決倉卒煩劇中能井然辨其條理開誠布公人不忍欺

歷署運使府篆陞兩淮運使揚士民立碑頌德 康熙志

姜採字如農山東萊陽人進士知儀真縣清介自持不

畏強禦真邑故掣鹽地御史委之掣諸商或以羨例進

輒斥去時軍需旁午採獨畱心撫字流寇震鄰守具咄

嗟立辦賊遊騎已至鍾家集聞有備解去乙亥議開新

城運河採力陳弗便主者執不從後果無成河臣得罪

并累採採不自明十年始以治績考最擢禮科給事中

上疏論柄相蠹國忤上意下詔獄廷杖一百謫戍宣城

甲申後隱栖吳門者三十年疾篤誠二子曰必葬我宣

城無違君命卒邑人為立祠 儀徵縣志

趙龍字浴菴廣東番禺人進士崇禎初知興化縣時洪

水稽天先決建義口繼決新溝盜賊蠡起高郵鹽城往

來道絕龍率鄉兵往捕獲渠魁三十七人悉斃杖下餘

黨立散時水患頻仍民殫相望龍請緩徵不得即自拜

疏上之竟以是忤直指被劾落職 康熙志

閻炤河南項城人舉人崇禎五年知高郵州廉靜寡欲



與民休息時徵斂日繁炤不事鞭笞賦亦登額課試所拔皆知名士尤嚴馭胥吏不少假顏色以守正去官僅行李一肩士民惜之

高郵州志

徐日升字海樹山東長山人舉人知泰州修學宮尊經閣望海樓更新非一費不累民時鄆家莊饑民嘯聚幾蔓延公不動聲色卒就撲滅嘗書州大門聯云有一日閒且耕爾地無十分屈勿入吾門其與民休息可見矣

事見秦州志 山東通志云日升除泰州牧有殺人借尸以誣士子者力剖決之又案治豪黠民心大快

鄭二陽字潛菴河南鄆陵人進士崇禎八年以僉事備

兵維揚理繁劇如游刃九年流寇焚鳳陽陵寢江北震

動二陽簡練士卒戰守之具咸備寇再躡滁州陷和含而揚無烽火之警者皆其力也馭吏嚴不事苛細案無滯蹟公暇卽賦詩屬文江都學宮久圯樂器廢缺葺堂廡製筍虞有枯杏重花之瑞時巨璫以覈鹽至責監司行屬謁禮二陽屹然不撓璫亦心折之鹽政日壞竈丁困甚欲爲亂二陽扁舟往撫之皆流涕不敢萌異志五載以茂績召對擢巡撫安廬都御史揚人祀之名宦

縣志 崇禎泰州志 云七年任未知孰是

劉達字叔雲臨川人進士授寶應知縣莅任之初捕二三奸民置重典闔邑肅然時軍興急催科達先富後貧



由多及寡課登而民不擾建南北敵樓改水關百廢俱

興寶應縣志

張緒倫字彝敘安邱人進士授御史視鹺兩淮時度支告匱撫臣中官皆請增課緒倫力爭乃止歲祲捐金賑

救之山東通志

李含乙字青藜四川渠縣人進士崇禎九年任高郵州聽訟剖決如流有掾以五百金私餽者含乙即鳴鼓視

事撻掾幾死曰汝敢以羶啖我耶人皆憚服庚辰辛巳

大旱疫含乙倡邑中紳士煮糜設賑活災民數萬人任

六年陞祠部員外雍正志 高郵志秩官表云十年任未詳孰是

袁繼咸字臨侯江西分宜人進士揚州兵備副使獎廉

抑貪鋤奸扶善郡守某受賂鬻獄繼咸發其贓罪狀守

懼伏胥吏強暴者折以刑境內又安時中官楊顯名飭

理兩淮鹽務御史轉運使以下跪拜趨謁而繼咸獨不

屈顯名不悅劾退之通國謹譁閉城門遮雷者十餘日

繼咸慰諭之乃出去揚州數月朝廷悔悟擢繼咸巡撫

楚中雷士俊大政記

劉士璟字昆白遼東復州人慷慨多大畧崇禎間以明

經授江都訓導時戎事倥偬入課生徒出佐守禦淮撫

史可法奇其才命攝興化令時興化大祲士璟以所服



袍帶募穀麥賑饑療疾民困獲蘇擢沐陽令流寇突至守城力盡不屈死贈山東按察使司僉事賜祭葬諡忠

烈

江都縣志

湯來賀字佐平江西南豐人進士崇禎十三年授揚州推官時歲大荒來賀請得米五千石及募輸之穀設廠煮粥更立藥局以救饑民之病者仍以餘米及贖緩購麥備來歲賑次年果復饑分坊案籍人各與麥一升復請改折漕糧民省四倍之輸漕撫都御史史可法疏薦其能會中貴督鹺來揚強郡邑行屬禮來賀不從移書諸縣令曰此膝一屈不可復伸諸君但以余為辭彼必

怨我願為諸君獨肩之其風槩如此尋內召以忤時相僅授部主事歷官廣東觀察

康熙志

歐陽蒸字憲文湖廣潛江人進士崇禎十三年知江都愷悌慈惠表裏如一糾紛盤錯而奏治若然校士於天寧寺時童子千餘人試卷山集蒸面加披閱試訖而甲乙已定所賞拔皆成名人服其識

江都縣志

韓文鏡字一水陝西韓城人崇禎間知揚州府精勤廉敏決疑獄如觀火凡錢穀之數布筭一過不爽銖黍吏民偶一見者逾年能署其姓名以故人不致欺時流寇震鄰文鏡部署守禦保障有方窺伺以息揚人賴之

雍正



武備字彝白蘭陽人進士授長垣令調興化興民疲弊乃力請豁積逋浮糧加增馬價攝秦郵篆保障孤城擒巨賊秦重六等時高傑剽掠揚州獨畏備不敢逼河南通志

孫鍾皋字唐斌富平人進士會福王南渡軍興旁午鍾皋治寶邑一切與民休息囹圄盡空胥吏改業民德之

甚深後調知興化縣

寶應縣志

舊志有常遇春王彬崇剛梅本師儒朱哀李遂劉景韶唐順之吳百朋黃得功史可法劉肇基任民育王

纘爵何剛吳爾璫周志畏共十八人俱詳事畧志又

陳瑄潘季馴二人非揚官今移入河渠志又單安仁

一人移入流寓志又薛希璉戴珊陳濂陳選滕昭馬

文升陶廷信黃如金八人皆係統轄無專屬揚州之

事敖德真不屈府隸蘭從善御試首選練綱專務攻

訐劉鐸結好闖兒四人皆無甚宦蹟今並刪



重修揚州府志卷之四十四

重修揚州府志卷之四十五

宦蹟志三

國朝

沈文奎字清遠浙江會稽人客遊遼東順治元年扈從入關次年總督漕務時區宇初定江淮多伏莽文奎綏輯多方十年再督漕運賑濟淮揚等處饑民全活無算

事見紹興府志及盛京通志

周亮工字元亮江西金谿人詳符籍進士順治三年以御

史招撫兩淮尋授鹽法運使行道臣事力請削舊餉行新鹽商因盡蘇課因以裕陞海防兵備時地方初定告



密者多亮工持以鎮靜人皆樂業海陵有黠奴密告宦  
 室謀反狀趣治兵掩捕之亮工偵知其妄全活甚眾一  
 日撫軍趣議事傳呼甚亟眾皆驚亮工徐行至堂下撫  
 軍作色曰吏報某地賊起待公急撲滅之來何遲亮工  
 曰以某料之必無是事撫軍恚甚曰觀察能以百口保  
 鼠輩乎亮工應曰能第倉卒未蓐食煩為某置食食訖  
 出呼騎士譙讓之曰撫軍趣吾會食向驚呼奚為於是  
 驚擾始定然亦卒無賊也未幾擢福建臬司

雍正志  
康熙志云

亮工撫恤凋瘵為民贖被俘子女無  
算廣儲門外白骨如山置義塚埋之

卞三元遼東蓋州人順治三年知揚州府時戡定之始  
 民多失業三元撫綏招徠流亡漸復田畝汗萊力請蠲

逋緩征期年之後地闢土滿凡侵隱絕戶產業告訐者

三元片言剖析人皆折服親臨學宮講導大義士子觀

聽者踵至累官至雲貴總督

雍正志

李嵩陽字弦佩河南封邱人舉人順治四年授御史巡

視兩淮鹽政時揚瘡痍未復舊商亡竄失業者過半鹽

筴凋耗嵩陽勸徠慰恤新舊俱集

雍正志

王宇春遼東人順治五年知揚州府諮詢疾苦每戎旅

經過親至郊外設供帳犒以牛酒約束出境毋敢譁者

勵操廉潔立銘座右誓不受枉法一錢民皆德之

雍正志



劉宗孟字輿瞻遼東人順治六年知儀真清峻愛民不受請謁無敢以私干者先時里下積弊正項一兩雜科加數倍蠹胥蠶食其中民欲避徭役田不受直悉歸之勢家宗孟盡革其弊民困始蘇時舟師入楚道必經邑供應無虛日宗孟出城犒師陳說邑民疾苦供億簡當牽挽不勞戰艦無停逗捐俸修四閘以利漕運民皆賴之

儀徵縣志

張元遴遼東人順治八年知揚州府汰冗役禁健訟不遣一胥至屬邑郡內以安三載遷金衢觀察後卒於漳南觀過揚州士民咸垂涕迎送之

康熙志

趙汲字潤宇遼東錦州人順治八年知泰州首擒劇盜

游三游四等民賴以安市河淤塞汲督民疏濬又修學

宮設藥厰代貧民完漕欠以除宿累州疊被水災田盡

沒民不聊生汲屢陳蠲恤皆得請崇祀泰州名宦

雍正志

李培真字仲儒夏邑人進士由贊善出爲揚州兵備道

副使時海寇猖獗姦民朱鋌聚眾千人爲內應培真秘

授方畧立擒賊首民賴以安

河南通志

劉毓桂字宮培壽光人進士授揚州推官剖決明析平

反冤獄發江洋大盜置舞文吏於法海寇掠江南潤浦

瓜儀皆震毓桂登陴城守措畫方畧寇知有備遁去

山東



通志 康熙志云時揚有巨猾犯法應追賊若干牽引私仇富戶展轉株染反因以漁利毓桂嚴鞠之盡釋無辜良民感頌

羅大猷字翊宸江西南昌人進士順治十二年知揚州

府為政持重不事紛更尤清節自愛在任二載無苞苴

私謁以公事誑誤免官人咸惜之雍正志

高光夔字念侶文安人進士為揚州兵備道值海寇頻

警大兵欲掃蕩淮揚光夔力為護持全活無算至今淮

揚猶尸祝之畿輔通志 泰州志云光夔至任首除蠹

派梁為居奇燈火費動輒數百門軍乘居民出入橫索錢光夔謂泰距揚百里當以揚之緩急為緩急一切持之以靜泰人始安

傅登榮字哲祥遼東人順治十四年知揚州以導民化

俗為先務率僚屬詣書院與諸生講論反覆辯難環聽

者千人郡人為立去思碑雍正志 康熙志云登榮有善政七事載於碑今碑文無考

姚延著字象懸浙江烏程人進士順治十六年任江南

按察使時天長縣草賊劉青海乘釁為亂掠民牛馬殆

盡高郵富民姚某陳某凡七姓有與為仇者誣以助賊

牛馬訟之州州申臬司延著察其無辜盡釋之擢河南

布政使去復為奸吏所持此七姓坐死徙數十百人皆

言公不去任則七人之身家可無恙也延著任江南司



臬先後活千萬人竟為仇者所中以死士民哭踊道祭

如喪其私親事見吳世杰 甌湖草堂集

李贊元海陽人進士授御史巡視兩淮釐政潔躬除弊

調劑得宜商竈歡呼凡所施行皆裨鹽政累陞督捕侍

郎山東通志

王士禎字貽上新城人進士任揚州司理讞海寇重案

全活甚眾以才名內擢揚人祠祀於平山堂與歐陽修

蘇軾共稱三賢云山東通志 康熙志云時荀興雀舫與四方名彥高會蜀岡紅橋授簡賦

詩者賢畢集一時傳為盛事

邱時中字拙叟山東濟寧人進士順治十七年知儀徵

縣明察執法邑無冤民嘗夜寢見一人持粉牌跪上有

十分處人四字驚起索火視之不見惟聞血腥時案牘

有殺人事悟曰此十八刀也詰旦訊之果肢解如其數

冤遂白又一日閱公牘微哂曰天下至公之事往往遂

成至私之事時以為格言儀徵縣志 案舊志 敘事未明疑有脫句

熊明遂字仲良江西豐城人舉人順治十八年知江都

縣邑故華侈示之以儉聽訟廉得其情片言立剖徐導

以禮讓皆悔悟和解去歲值編審明遂平徭均賦自訂

冊籍吏胥不能上下其手去之日囊無長物惟圖書數



童欽承字在公浙江會稽人進士順治末任儀真端謹  
不妄言笑初至繩吏嚴已而寬平惟期與民休息訟者  
自和講卽不問已亥後有大案廉得其情多所釋免邑  
人感之廉惠有聲遷內府中書舍人

儀徵  
縣志

胡崇倫字崑鵠浙江山陰人康熙三年任儀真令至則  
重築龍門橋壩浚市河治道塗嚴關廂丁未蝗入境不  
爲害又建糧廩於縣治前重鉞縣志爲功於邑者至多

儀徵  
續志

趙璠麟遊人由恩貢判景州擢興化令省催科重農桑  
民貧不能耕者貸給牛種俾無失業值歲荒發粟賑濟  
多所全活邑居淮河下流每歲工作椿草皆賦於民璠

令河壩遍植柳葦以備修築之用省費無算

陝西  
通志

軒轅允山東東平人進士康熙六年知江都縣廉靜清  
介爲政簡易八年以河工鐫級調用會制府勘河至揚  
士民遮道訴令賢不應去制府特疏請留仍知縣事所  
操益勵後復以註誤落職十三年用廷臣薦復起用焉

雍正  
志

汪兆璋字芾斯安徽黟縣人

錢塘  
籍

康熙六年官泰州運

判屬場蝗起兆璋出粟購捕蝗滿石給斗粟數日蝗抱  
草木死在職九年以廉幹稱嘗增輯中十場志

東臺縣  
志稿



朝竟得

汪時泰湖廣人進士康熙七年任儀真知縣縣濱江田歷歲坍沒凡八十六頃有奇額課未除里民至鬻妻孥以辦國賦前鳳陽巡撫張某兩疏請豁均格於部議康熙四年清丈田畝儀徵丈增田一百餘頃里民因復牒請以抵坍額上不虧國課而下可拯沈災邑令某猶難之時泰至始慨然請於府司陳乞再三遷延兩載會巡撫慕天顏莅任時泰復具冊籍申請如前天顏以請於

俞旨以新增抵舊額盡蠲坍田額賦里民無不驚喜勒碑紀之

事見張玉書蠲免儀徵縣江州田蠲碑記

陳洪諫號菊菴山東德州人進士康熙七年知興化縣興邑疊罹水災饑饉遍野洪諫目擊心慘會巡撫至刺血寫書為民請命血盡有賣菜傭搯鼻出血以助之書七上乃得請民賴以活後陞撫州知府晉神木副使

興化縣志

馬祐字篤周滿洲人進士歷官江南巡撫密疏請蠲康熙元年至八年舊賦一百九十餘萬九年淮揚等郡水災疏請蠲賑民免流離十五年霖雨淹沒田廬積憂成疾自草遺疏極陳民困言不及私聞者感泣

盛京通志

孫蕙字樹百山東淄川人進士康熙八年知寶應縣時



淮黃俱決寶邑田廬盡沒民貧不可狀蕙首除雜派歲省鉅萬計漕渠淤墊歲徵夫七千二百濬四十日漕乃通蕙不忍勞民徵夫少濬不如法都御史怒將劾之邑人爭趨赴畚鍤一夕至者二萬人閱三日工成蕙譽望大著請鳳米解淮免輸輓之費以官銀雇兵船繹夫民不為擾又革馬戶官農裁并更夫解役糧單及供頓支正項諸事亦歲省千餘金以卓異擢戶科給事中

寶應縣志

高珩棲雲閣文集云三逆發難大軍南征蕙白大將軍戒軍士勿暴掠將軍唯唯蕙即揚言於眾曰奉將軍命登岸害民者置之法立催出境

徐旭齡字元文錢塘人進士歷雲南道御史視鹺兩淮時黃淮並決流民載道旭齡區畫賑給全活甚眾歷遷

工部侍郎總督漕務至淮以籌三便釐三害等疏奏請

悉見施行卒謚清獻

浙江通志康熙續志云時商課徵納羨浮於額姦豪盤踞歲斂金錢恣出入不可問商日凋耗旭齡疏陳六苦三弊特旨嚴禁鹽困少甦

慕天顏字鶴鳴陝西人進士康熙十三年任江蘇布政使值揚屬河堤大決田廬漂沒災民皆露棲堤上無食無衣天顏親歷撫恤發帑治蓆篷按口給粟徧賑仍且疏請以水退涸出田畝三年後始徵稅糧並為區畫牛種招徠復業俱得

俞旨其奏牘剴切委婉讀者感泣後擢江蘇巡撫晉漕運總督



仁心善政民至今傳頌不衰雍正志

金鎮字又鑣浙江山陰人舉人康熙十三年補揚州知

府值撤藩兵變長江上下風鶴相驚維揚適當其衝城

中震恐一日三徙有爭門而奔者鎮力為慰諭人心始

安時兵馬繹騷鎮處以鎮靜事治而民不擾遷江寧驛

傳鹽法道副使事見毛奇齡西河全集康熙志云郭

之五旬落成大會賓客飲酒賦詩傳為盛事修郡志四十卷皆手自編纂

郝浴字雪海直隸定州人進士康熙十五年以御史巡

鹽兩淮時三逆未平鹽法壅滯恤商裕課多紓良策揚

屬歲歉疊勸商人捐穀賑濟全活饑民甚眾擢太常寺

少卿再擢副都御史仍留巡鹽任兩載授廣西巡撫去

日商民送者萬人康熙續志

任國鑛蕭縣人舉人康熙十六年署江都教諭正身以

率口不言錢與諸生談文藝以行誼為先諸生有貧弱

為勢家所辱者國鑛直之以扶士氣眾尤服其剛正雍正

志 舊志作十五年任今據府縣志秩官表改

白登明字林九遼東人康熙十八年知高郵州甫莅任

歲大旱蝗次年復大水民多殍散登明請賑招徠多所

全活征收於正額外不取耗羨讞獄片言立剖不假胥

吏手時吳逆初平軍旅回北供億夫役與民約以城頭



吹笳爲號屆期無後至者上司有所檄調不輕發一人曰吾寧得罪去不忍勞吾赤子也以疾卒於官橐貧如洗郵人皆涕泣失聲且以資助其殮雍正志崔舉字蓮生直隸平山人進士康熙十九年知揚州府慈愛明察歲甲子

上諭大臣會舉天下廉能官員時 廷薦者七人以舉爲第一

兩江總督缺得列會推故事所未有也尋擢兩淮鹽法道值三逆畔亂軍興旁午又輸桅木賑饑民咸取給於商商困甚舉權宜變通令先行鹽後納課行之數年商本漸裕禁私販除加耗浚河築隄賑竈恤丁兩淮戴之

若慈母

事見越土勝讀書堂文集

江都志云舉修學

宋實穎字旣庭長洲人舉人康熙二十四年授興化教

諭實穎文章學問負海內盛名旣就一瓊凡學使按臨暨諸上官咸加優禮異於常格然實穎終無干請蓋飯自甘惟與士子以經術相砥礪人益賢之雍正志

高承爵奉天人康熙二十五年知揚州爲政寬平舊有供應規例取之各屬咸革除之尤加意學校在任三載治行甚著超擢江蘇按察使雍正志

熊開楚字文友湖廣石首人進士康熙二十六年知江都縣立易知由單吏胥不得上下其手更除漕米包攬



之弊勤賑濟瘞遺骸爲貧民贖已鬻子女惠政甚夥三

十二年行取去

雍正志 舊志作二十四年任今據府縣志秩官表改

施世綸字文白福建晉江人康熙二十六年知泰州興

教化勤撫字清刑獄絕請託嚴察吏役革除耗羨州城

罹水災多傾圮世綸按行城市知廢磚積灰可用捐俸

俟助民樂趨事不日竣工開浚下河役不累民二十八

年陞揚州知府

泰州志 雍正志云世綸知揚州府聽訟敏決百姓奉之如神嚴保甲裁冗費

減房租禁婦女入寺善政甚夥

謝廷瑞字晉石遼東人康熙二十九年任高郵知州時

承歲歉之後道殣相望廷瑞撫之以忠信慈祥催科不

事鞭撲民亦竟無逋負兩造具質但剖曲直未嘗輕笞

一人士農樂業盜賊屏息莅任十有六載茶逢

**仁廟南巡除道供頓閭閻不擾嗣以爲民賠累去官遠近持薪**

米餽蔬肴者相繼病沒旅舍童叟無不隕涕

事見高郵州志

傅澤洪字樸菴奉天人康熙三十二年知揚州府性廉

介聽斷尤明敏凡訟於庭者雖歲月屢易一見輒識之

曰爾卽某時某事在案者也人驚以爲神每斷疑獄就

其辭以罅攻之不煩言而剖自是無誣告爭訟日稀既

因水災急賑以擅發倉穀論罷民攀留涕泣者溢於道

久之開復留河工効力貧至無以自給嘗以公事重至



揚部民爭致壺漿澤洪卻其餽慰藉之去未幾授宿虹  
同知擢淮揚道副使揚民尤被其惠澤洪精通水利纂  
刻行水金鑑一百七十五卷行於世雍正志 陳震發  
郡侯傳公去思序  
云先是丙丁間以河決坐報荒田得罪至己卯又緣屬  
邑逋賦不清坐解任 案行水金鑑歸安鄭元慶撰澤  
洪增刊 行之

金依孔字魯山遼東瀋陽人康熙三十五年以揚河通  
判駐高郵時淮河交漲灌高郵湖城不沒者三版依孔  
帥吏卒築南北兩關身先畚鍤履汚淖中凡三晝夜不  
休城得全郵人書其事於石又捐貲設賑以拯遠近之  
漂溺者去官後終於次子儀真官署喪過郵郵人皆為

泣下高郵  
州志

張增字子晉順天宛平人舉人任寶應縣丙子丁丑淮  
南大水界首子嬰隄潰增冒風雨中夜至為書告長吏  
請閉涵洞使民得修隄雨連月不止隄數築數決明年  
春增召邑人告之曰秋時水潦降洞開而築不堅及春  
為之費半功倍乃官市隄下田數頃益拓其故址三旬  
而成時有修河補官之令皆怙勢掘民田不給價增請  
於上飭禁之不聽者一繩以法居官七載吏民謳思之  
寶應續志稿 案雍正志秩官表作康熙二十五年任  
攷徐繼寶應志修於二十八年尚無增名以丙子之事  
推之當是三十  
五年故列於此



張瑀字石公直隸無極人進士康熙三十六年知江都  
縣事時奸猾肆行瑀取其渠魁杖殺之境內以肅創印  
冊以稽賦稅分十限任民輸納親投入櫃不假吏胥手  
至今仍之瑀勤於治事躬理煩劇輒逾月不解衣寢越  
五載以憂去

雍正志

晉璿字玉衡山西長治人舉人康熙四十年知江都勞  
於撫字民戴之如父母丈量洲田豁坍升漲尤稱至允  
後以疾去民恒思之

江都縣志

李之檀字含香山西靜樂人歲貢生出教諭累擢知高  
郵州爲人廉介自立康熙丁亥

仁廟南巡故事必先集船夫數千人鎖閉之恐其散逸也春時

人氣蒸鬱饋食又不時每多死之檀結以恩信散處之  
及期而集江都丹徒二縣爭洲田巡撫某檄之檀丈量  
丹徒豪賄以五千金拒不納田竟歸江都州民李荆玉  
以負州弁逋走竄以死其家訟之監司將論弁抵之檀  
以死無據卒出之總督噶禮驕而橫官屬無敢逆者列  
款劾江蘇布政使某

上遣部

臣按之屬皆誣服之檀終不承江淮歲有龍衣寡婦花  
果船過而寡婦船尤橫州縣多畏避之之檀以其應給  
大書於版非所應給雖要求之聲沸水上如不聞自是



無橫索者嘗攝寶應縣事有兄弟訟產諭之曰若等知兄弟爲同產乎曰知然則豈不知同產爲同受父之產而忍爭之乎且父產田土也同產骨肉也以田土訟骨肉可乎又諭其弟曰產有財可買同產之兄雖有財能買乎於是皆愧悔息訟高郵城西有長湖水險惡多溺人乃爲舟二拯之賴以生者四十六人貧或不能嫁娶之檀出貲成之凡六十餘家助斂葬者亦五十餘家後以伉直去官卒高郵民思而哀之

事見宋和橋西草堂稿

李陳常字嶧山浙江嘉興人進士康熙五十年任兩淮轉運時鹽引積滯梟販充斥與制府提督協議招徠千

六百人編入營伍或資遣回籍私販乃絕甲午揚屬亢

旱爲粥食飢者全活無算巡視兩淮漕政與張鵬翮趙

申喬張伯行諸人稱十廉云

嘉興府志

盛宏遂字東田臨安人進士康熙五十一年任興化縣

政和民安邑舊編設甲頭催徵租賦民頗爲累宏遂革

除之邑人至今感頌

興化續志稿

陸師字麟度浙江歸安人進士康熙五十六年令儀真縣下車卽修葺學宮朔望集諸生談說經義每月會課諸生喜得名師縣爲水陸孔道舟車夫役人給以值民不爲擾剖讞不事鈎距獄無遁情有犬猾肆虐被其害



無橫索者嘗攝寶應縣事有兄弟訟產諭之曰若等知兄弟爲同產乎曰知然則豈不知同產爲同受父之產而忍爭之乎且父產田土也同產骨肉也以田土訟骨肉可乎又諭其弟曰產有財可買同產之兄雖有財能買乎於是皆愧悔息訟高郵城西有長湖水險惡多溺人乃爲舟二拯之賴以生者四十六人貧或不能嫁娶之檀出貲成之凡六十餘家助斂葬者亦五十餘家後以伉直去官卒高郵民思而哀之

事見宋和橋西草堂稿

李陳常字嶧山浙江嘉興人進士康熙五十年任兩淮轉運時鹽引積滯梟販充斥與制府提督協議招徠千

六百人編入營伍或資遣回籍私販乃絕甲午揚屬亢

旱爲粥食飢者全活無算巡視兩淮漕政與張鵬翮趙

申喬張伯行諸人稱十廉云

嘉興府志

盛宏遂字東田臨安人進士康熙五十一年任興化縣

政和民安邑舊編設甲頭催徵租賦民頗爲累宏遂革

除之邑人至今感頌

興化續志稿

陸師字麟度浙江歸安人進士康熙五十六年令儀真縣下車卽修葺學宮朔望集諸生談說經義每月會課諸生喜得名師縣爲水陸孔道舟車夫役人給以值民不爲擾剖讞不事鈎距獄無遁情有犬猾肆虐被其害



者無算師擒治之闔邑稱快春秋不設限催征秋成諭糧戶自封投櫃民便之邑舊有運鹽羨利師不取為建倉厥修囹圄更捐俸設藥局以療邑之病者輯縣志二十二卷皆手自批纂行取擢吏部驗封司主事遷廣西道御史授山東濟寧道卒

儀徵縣志

徐大中字南村華亭人康熙五十六年任泰州學正正身訓士以范希文為己任顏其堂曰范任雍正初與知

州褚世暄重輯州志

泰州志稿

項維聰字穎叔浙江嘉興人舉人康熙五十七年知江都縣事丈冊江地以贏補絀豁枯丁令隨田辦核三汊

河疏淺費商減金千餘民減夫五萬歲著為令三年行取百姓以水一器鏡一圓送之

雍正志

李昭治字虞臣四川西充人舉人康熙五十七年知儀真政尚寬平而清介難犯不敢干以私邑之運河舊例三年兩浚然無正帑可支俱商民派捐昭治至自輸俸錢雇夫疏撈城內市河南通江水東引淮流久淤塞因士民請開之闔邑稱便莅任六年精勤吏治案無停牘訊鞫疑獄明察如神修城墻鑿泮池葺社稷山川壇新城隍廟宇建歷代忠烈祠又特建忠節苗公祠遷復伍公祠於胥浦故處張弛損益百廢具興撰縣志三十



卷方議開雕遽以疾卒於官

儀徵續志

張文英正黃旗人舉人康熙六十一年知興化縣安靜不煩清操自矢有釜魚甌塵之風邑人戴之

興化續志稿

蔣鶴鳴字陞遇浙江嘉興人舉人令舒城雍正元年調

江都廉靜和平盡力設賑舉同仁會周貧者學宮舊無

樂器祭器鶴鳴創製之以銅件繫其斤兩著之籍越歲

以捕蝗積勞卒官

雍正志 舊志作二年任今據府縣志秩官表改

袁載錫字心友青浦人舉人雍正三年任江都教諭月

課生童品題不苟赴者雲集載錫為質衣備試卷贍飲

食祭祀必誠必恪捐俸募修學宮兩廡及名宦鄉賢祠

志

黃廷銓奉天鑲紅旗人貢生雍正五年知高郵州事性

剛直約束胥吏甚嚴人不敢干以私歲大水大吏檄開

城南諸壩廷銓以秋成近懼傷禾稼請保護二十餘日

忽西風大作波濤洶湧隄欲潰廷銓灑泣籲天晝夜修

防風浪頓息人以為神後壩開田已收穫遷太倉州知

州

高郵州志

褚世暄字華峯直隸宣化人初任山東范縣

憲廟聞其賢

錫以



震翰擢用知州雍正五年知泰州置藉田建先農壇庶政咸舉

重輯州志皆其手創

泰州志稿

陳宏謀字汝咨廣西臨桂人進士由檢討歷御史雍正七年授揚州知府仍帶御史銜得奏事揚本東南都會風俗奢淫商民雜處最稱難治宏謀鎮以廉靜日坐堂上民有訟卽時剖決吏役不能生事會歲歉災黎仰賑宏謀親行履勘振給無遺有災民於初勘時挈孥外出者冊籍無名至期不得與賑宏謀爲奏請咸得補給尤振興文教以堪輿家言浚城中河揚郡科名復振捐俸建普濟堂收養老病縣獄隘囚多瘐死爲增屋居之並

買田歸縣收租以補囚糧之缺城南關河岸峻水駛小

舟爭渡多覆溺造巨艦以待濟後再任江蘇巡撫入爲

吏部尙書東閣大學士卒諡文恭

陳文恭公行狀

許松佶福建閩縣人雍正七年知高郵州值歲歉悉心

賑恤嚴絕侵漁災黎皆被實惠素節儉自奉甚薄約束

諸吏役嚴而有法清聲徹遠邇官至江蘇布政使

高郵州志

郝震字恒然順天霸州人雍正七年任興化令慈祥愷

悌民甚德之徵漕不取羨餘有縣丞某索漕規不得誣

以浮收遂落職士民間之號冤聚畱者數百人新令至

震便服出城民以農具塞郭門伏地焚香呼聲雷動震



日我何德於民而爲此新令真賢宰無我念也必若此  
恐反累我耆老以震語諭衆始開城納新令而迎震於  
署西別館日致供億野老村姬餽蔬果相繼惟恐震之  
逸也忽一夜傳震已去衆驚走相告急叩門見震始退  
新令以達於上寃得釋就道之日焚香叩送者哀號不

絕興化續志稿

張師載字又渠儀封人禮部尙書伯行子舉人雍正九  
年以郎中出知揚州府值歲歉高郵牧不以告師載自  
勘得之亟散賑全活甚衆於運河建置諸閘以司啟閉  
芒稻閘當汎流之衝宣洩尤捷商人利蓄水以運鹽請

於運使恒閉弗啟入夏水暴漲民田漫淹師載察得其  
故逕往啟之水洩田乃有穫遷河庫道續河南通志

傅椿字毅齋滿洲鑲黃旗人監生雍正九年任高郵州  
事廉明勤幹庶政具舉邑時苦水災椿悉心察訪著籌  
淮八議一書又以城東地窪下水盛則一望汪洋乃沿  
城濠築隄蜿蜒數里植柳百餘株至今稱傅公隄事具高郵志

州  
尹會一字元符直隸博野人進士雍正十年知揚州府  
尋擢兩淮鹽運使仍攝府事生平講學以程朱爲歸居  
官和平清介疏城河以通百貨西郊負郭之田因以灌



漑捐製馬船於揚關以濟行旅民額之曰尹公義渡重建安定書院興起文教修白駒場三閘利鹽運乾隆元年擢兩淮鹽政買餘鹽以息私販加滷耗以紓商力為揚州城守奇兵二營捐給資本銀二千兩俾兵丁於訓練之暇營運生計官至吏部侍郎

事見兩淮鹽法志

龔鑑字齡上浙江錢塘人以拔貢為甘泉令揚固脂膏之地鑑下車卓然自矢凡請託皆不行巨室某嘗延飲白運使以下咸赴鑑獨拒不往邵伯鎮受高寶諸湖之水地卑下鑑謂當於農隙築隄為防隄上即植桑以興蠶事其西界地高常苦旱宜每一里為水塘以蓄之大

吏避其議然不能行鎮下有芒稻閘洩水尤要雍正癸丑大水泛濫冒雨親至其地呼閘官洩之則以鹽漕為詞不可會河督嵇曾筠以視河至鑑陳請詞甚厲曾筠動色即啟閘斥閘官去又用其言定以蓄水六尺為鹽漕過湖之需過此即啟放自是水不為患在任六年以

遭外艱去事見全祖望鮑琦亭集

吳銳字穎長當塗人舉人雍正十一年任江都教諭砥礪廉隅士習丕變公庭鮮子衿之迹自處尤刻厲苜蓿盤殮取嚴一芥後舉博學鴻詞未幾卒

江都縣志

金秉祚湖北當陽人雍正十二年知興化縣寬嚴並濟



訟息賦平莅治既久愛戴逾深去官日萬姓攀轅遮道如襁褓失怙恃焉興化續志稿

李宏字濟夫奉天正藍旗人乾隆元年任揚河通判與

州牧傅椿悉心講求水利陞任同知協挑王家港南北

澄子等河後總督南河三十四年洪湖水漲高堰三壩

齊開郵邑城南五壩危甚宏親臨履勘督率兵弁搶築

子埕竭力保護是年遂獲有秋郵人到今尸祝之高郵州志

沈錫鼎字定九浙江仁和人生員效力南河敘勞擢知

縣再任寶應愛士出於至誠諸生有爭訟者必反覆譬

曉不施箠楚每月招生童課文執筆定甲乙遣吏傳送

數年士爭向學無涉訟庭者遷宿虹同知卒邑人祀之

於文昌官寶應補志稿

李鵬舉字翔嵩廣西人舉人乾隆十四年知儀徵政尙

寬平修學禮士嘗舉鄉飲酒禮立申明亭榜善惡於縣

治前解組後邑人愛戴畱儀徵數載口以薪水供之儀徵

續志案自雍正元年始改儀真為儀徵

李洵德奉天正黃旗人乾隆十六年知高郵州事聽斷

明察有能吏聲城北長生菴廣田宅僧衆多為不法洵

德察得實悉屏逐之以其地改建珠湖書院歲延名師

餼給諸生咸取資於寺田郵之有書院自此始大學士



陳宏謀時撫江蘇亟稱其能擢處州府知府事具高郵州志

王又樸字介山直隸天津人進士乾隆十六年署秦州

運判東臺至秦壩一百二十里舊有楊公隄水衝坍陷

又樸力請重築以利率挽議者以費重難之又樸捐資

乘空鹽艘之便載秦州浚河土投淤溪秦潼最深處月

餘成隄二十丈上官因以其事委之隄成商民賴焉東臺

縣志稿

李世傑字雲巖貴州人乾隆二十二年知秦州事性和

易待宵小極嚴下車時有撻之至死者姦宄多斂跡去

秦之下河田倍上河遇大水汪洋為巨壑世傑請於上

白鳳尾橋下達東淘築隄數百里水不為患每數里置

一橋橋有堡沿隄種柳至夏悉垂蔭以芘行旅又修學

宮建胡公書院文教一興後任兩江總督入為兵部尙

書卒諡恭勤秦州志稿

衛晞駿字卓少陝西韓城人進士乾隆二十九年知儀

徵惠商愛民勤於課士每月朔謁文廟集諸生於明倫

堂講論制義詩賦創樂儀書院作記勒石會遷去邑人

思其德於書院設位奉祀春秋弗替儀徵續志

白雲上字凌蒼河南河內人武進士乾隆三十年任揚

州遊擊揚營兵卒素窳惰生事雲上教誠約束營制以



肅校場舊在新城民稠地狹總督高晉檄移蜀岡之陽  
 雲上植柳萬株以麻士卒驛堠營堡皆令插柳夏藉遮  
 蔭冬備樵採人享其利揚郡屋宇鱗比風日晴燥常致  
 火患舊製有太平桶水砲兵士演放久疎臨事手棘雲  
 上至猝令演試懲不如法者日置馬二伺火發即飛騎  
 救不待報嘗曰火必有路審向背候風色取其要害撲  
 壓之餘可自止體趨捷升屋如飛拉木摧墻火無不應  
 手滅奸民劉長有屢縱火思掠財物雲上邏得既首伏  
 有欲曲庇之者雲上與力爭卒伏法自是火患遂稀揚  
 城十萬戶恃蘆葦以爨每束定價三十三文柴艘自瓜  
 洲至城吏胥任意濫索柴斤日減雲上先禁加派以病  
 商者復察偷減以病民者商民兩利城西壤接泗州山  
 地無溝洫常苦旱去城七里有龍王廟甚湫隘雲上徒  
 步虔禱七日夜大雨如注後擢金山參將去揚民泣送  
 者四十里不絕沒後二十年郡中士民列其事聞於

朝入祀名宦祠

遊擊白公靖  
祀名宦事實

錢汝恭浙江嘉興人大司寇陳羣子乾隆三十一年任  
 興化令起家世胄作宰清剛剔弊釐奸刁頑斂迹三月  
 而邑大治以憂去

興化續  
志稿

王鎬字介巖浙江會稽人乾隆三十一年知泰州事泰



瀕海城庫下可踰越鎬請帑增築民無盜警又以地廣難理分州境設東臺縣自鎬發之重建浴沂亭於學宮

修安定書院士多向學

秦州志稿

葉均字階平上元人由工部掾考滿發河工乾隆三十一年補寶應主簿邑瀕運河置閘與涵洞二十餘所田畝皆資灌溉往時水小則慎閉以濟漕而民苦旱水大又宣泄以保隄而民苦潦均相時緩急調劑有方公私交利丙戌夏大水均以閉閘為通守所揭河督召均問狀均言高郵三壩水志不至三尺不開今水未至三尺奈何不顧百姓河督聽其言置不問未幾以憂去起復

補原官壬寅大旱又以啟閘忤監司意賴河督知君得

無事累遷邳州州判

劉台拱撰墓志

王玉成字樸菴貴州畢節人舉人知東臺縣時以海疆多悍民故設縣令資彈壓玉成至徙其渠魁餘皆向化設經舍課生徒諸務草創措置皆有條理去之日泣送

者塞路

東臺縣志稿

謝宣雲南昆明人舉人乾隆三十四年任寶應令善聽訟執法不少貸案牘至輒結無踰十日者終宣任市無酗酒爭奪之釁其桀獍者皆斂跡改調蕭縣以捕蝗不力罷宣去寶應百姓送之數十里及歸貧無資斧蕭縣



民奔走釀錢贈之

寶應補志稿

王蒼字浩旃直隸大興人貢生乾隆三十四年任儀徵縣丞值旱蝗督捕甚力署縣事數月潔清自矢明於聽斷吏民畏之後調寶應縣丞陞邳州知州

儀徵續志

涂躍龍字振初雲南景東人舉人乾隆四十一年知東臺縣才識明敏以教化為先振興學校倡建文廟士民樂於從事一時捐輸者萬餘金惜工未竣被劾去

東臺

縣志稿

于國秀大興人乾隆四十一年任泰州游擊彈壓兵民寬嚴相濟時州境患蝗國秀督兵撲捕數十晝夜不忘

或以致病請稍息國秀言捕蝗猶捕盜稍畱遺孽則前

功必廢予雖病不恤也盡殄乃止是歲蝗不為災

泰州志稿

王學濂浙江仁和人進士知上海有治聲乾隆四十四年調任儀徵未入境吏民間風悚懼下車後潔已奉公境內肅清以父憂去邑人至今思之

儀徵續志

黃廷傑休寧人乾隆四十四年任東臺縣丞廉隅自飭門清如水恒施藥濟人邑人甚德之

東臺縣志稿

翟燾涇縣人廩貢生乾隆四十四年任東臺訓導時文廟初建樂器儀制一切未備燾次第增置秩然可觀典史與某生構難邑宰入其言已通揭矣燾直白上官



力辨其誣事遂寢

東臺縣志稿

吳春澗初名蔣源字朗陵浙江秀水人舉人大學士高晉總督兩江聘爲掌書記以沿河知縣奏畱乾隆四十八年補寶應邑故有開洞所以利漕亦以便民當事者以輓運爲急每四五月民田急資灌溉之時防遏愈甚春澗至務在利民徑先啟之然後報歲甲辰境內亢旱終獲有秋皆其力也在任一年卒於官士民惜之

稿

寶應補志

袁秉義字介夫直隸宣化人進士乾隆五十年知泰州公正廉靜敏於聽事案無滯牘盜賊不敢入境時有神

人之目歲丙午大水秉義屏胥吏至村堡按戶給賑

商聞其賢餽金四千受之至除夕悉出以給民日居浮

香亭讀書史作擘窠字招諸生之秀者至署課之給資

贍其家後遷淡水同知

泰州志稿

姚益澍字補軒浙江歸安人乾隆五十三年任東臺典

史嘉慶六年再任慈惠廉謹秩雖微不受私餽妄責一

人見人輒與談朱子格言感應篇人皆以道學稱之後

卒於官士民無不流涕

東臺縣志稿

段大雄字鶴峯湖北荊州人乾隆五十三年任泰州游

擊約束弁兵勉以忠孝大義一時循循皆知禮讓喜延



接文士書跡學晉人邑人有儒將之目

秦州志稿

王國龍安徽懷寧人乾隆五十五年任秦州守備汰老幼募壯勇營務修飭緝捕巡防尤殫心力在任十二年閭閻安靜皆沐其惠後以老罷歸民甚惜之

秦州志稿

申淑泮字閔芹河南延津人爲南河主簿以勤能稱嘉慶元年遷儀徵縣丞入境首葺文丞相祠並刊與難諸人姓名爲書以傳浚河得張孝女赴火救父石碣亟請於大吏得補旌並建祠焉節孝祠久圯捐俸重新之七年邑大旱淑泮長跼烈日中以禱數日雨大降淑泮亦病未幾卒

儀徵采訪錄

陳廷棟字錦堂浙江錢塘人嘉慶六年知秦州公勤自勵折獄如神在任三年苞苴屏絕以廉明稱

秦州志稿

王勸字蠡臺湖北麻城人舉人嘉慶八年知秦州乙丑大水流孳載道勸每見輒哭邑人感其意競捐金賑濟

明年卒於官

秦州志稿

案舊志有新輔于成龍張鵬翮陳鵬年四人今並詳河渠志又麻勒吉阿席熙湯斌傳臘塔張伯行五人皆係統轄無專屬揚郡之事今並刪



重修揚州府志卷之四十五

五  
卷之四十五  
三



